

HA EKABA MODIMO A ENA LE RONA, E KAE MEHLOLO YOHL?

 Ke a o leboha, Moena Neville. Dumelang mantsiboya, metswalle. Ho kgutla hape. Ke qetile dihora tse nne hoseng hona. Ke mahlabisa dihlong. Mme ka mora ho bua dihora tse nne, le tlamehile le be le kgathetse ke nna, hoo le ka ntelekang sefaleng.

² [Phutheho e re, “Tjhe!” Monyane wa Moena Branham, Doc, o re, “Taba eo e a nkgopotsa. Motho o buile kajeno hore ka mehla o siya sehlopha sa dintho, tseo o sa di finyelleng.”—Mong.] E, monghadi. [“Empa bosius bona, Moratuwa, o ka qeta nako yohle eo o e batlang.” Phutheho e re, “Amen!” Doc o re, “Ka hona, ha o a tlamehla ho fosa letho la Yona.”] Ke batla ke ngotse halofo ya Bibebe yohle mona. [Motho o re, “O na le bosiu bohole, ho rera.”] Re na le baena ba mmalwa ba theko e thata mona, re batla ho ba utlwa.

³ Ke ba ba kae ba natefetsweng ke tshebeletso hoseng hona, wa . . . [Phutheho e re, “Amen.”—Mong.] Hantle-ntle, dihora tse nne. Ha ke tsebe hore teipi e mathile ha kae.

⁴ Kgaitseya ka o ntetseditse, ka mora tshebeletso, mme a re, “E ne e se wa motho e mong o sele.” Ho re, “O tshwanetse o be o no o tobile nna. Mme ka re,” ho monna wa hae, “Junior,” ho re, ‘o ile wa nahanang?’ ‘Oh,’ a re, ‘Ke utlwile Moena Branham a etsa hantle ho feta mono.’” A re, “Ka tseba ruri hore o tobile nna kaofela,” a rialo.

⁵ Ke dumela hore o teng morao mono, ho seng jwalo ke ne ke tla mmolella yona, empa ke tla e tlohela feela. Delores, o ho kae? Ha a yo mona. Be, ke tla e phetha he. O ile a re, “Ke bile molato wa ho o sebedisa ho se ho kae, o a tseba, meikapo; ho kuta ho se ho kae.” Ho re, “Ho fedile.” A elellwa hore ha a eso shwe, le a bona. O tlameha ho shwa, ka hona ho o bitsa molaetsa wa . . . bakeng sa Selemo se Setjha. Morena a ke a abe mahlohonolo a Hae.

⁶ Ho monate, bosius bona, ho bona bongata bo ka hare. Moena Graham Snelling, ke kene ka nako feela ho mo utlwa a qetella sefela seo sa kgale, “Mme Re Tla Ya Aha Leralleng La Sione.”

⁷ Ha ke kgolwe ho ena le motho ka mona ya hopolang Rabbi Lawson e monyenyan. O teng ya mo hopolang? Eya, ba babedi kapa ba bararo ba lona, Moena Graham le Moena Slaughter. Hoo ha nkgopotsa Moena Lawson. Le ka moo a neng a ye a bine? Mothwana, e monyenyan, ke ne ke mmitsa “rabbi” kaha a ne a rwalwa nthwana, e sepapetlwana, katiba e ntsho.

E le moreri wa Pentekosta. Empa, ka digalase tsa ditonana tsa kgetla ya kgudu, mme ka re, “O tshwana le rabbi hantle.” Mme ka mehla re mmitsa, “Rabbi Lawson,” moenanyana ya kgabane. Mme o—o ne a tsofetse hona, o ne a kena a kobame; o ne a hatiswe ke koloi, mme mangole a hae a satalla. O ne a leketlisa kratjhe ya hae, kapa seikokotlelo sa hae, ka lehlakoreng *lena* mona. Mme ke dule setulong. Mme e re ha a fihla karolong eo mono, “Mabidi wohle a bophelo bo timelang a tla ema tsi,” a qotse seikokotlelo seo sa kgale, a se behe mahetleng a hae, a se hokele hantle molaleng wa ka, le ho nnyolla hantle *tjena*, ho nkopela hantle ka sephaka sa hae, le ho re, “ke moo re tla ya aha leralleng leo la Sione.”

⁸ Mang feela, o teng mona ya neng a tseba Rabbi Lawson? Ba mmalwa feela ba lona. Ke batla ho bua sena, ke hona. Ntho e makatsang e ne e mo hlahеле. E ne e le moreri wa makgonthe, e monyenyane, moena ya kgabane. Mme o—o ne a sa lefise haholo; e ne e se sepheo sa hae seo. Empa, ke dumela hobane o ne a phela ka botshepehi hodima seo a neng a beilwe molebedi wa sona, ke ntho ya sehlooho eo.

⁹ Mme mosadi wa hae a nahana hore ha a etse tjhelete e lekaneng, therong, ka hona a mmatla hore a fumane mosebetsi. A dula a bala Bibele ka mehla. Ka hona tsatsi le leng a mo halefela hona, a phamola Bibele hantle hodima hae, a E isa kwana, mme a bula setofo, le ho e sunya setofong mme a E tjhesa. Dikgwedi tse mmalwa ka mora moo, o na hlophisa masedi a itseng a Keresemose, mollo wa sefate sa Keresemose wa mo hotetsa wa mo tjhesa lore, hantle sebakeng sona seo. Le a bona, o kotula seo o se jalang. “Se ameng batlotswa ba Ka, se etseng baporofeta ba Ka hampe.” Le a bona?

¹⁰ Ho nahana ka Lentswe la Modimo. Batho bao ba hlahetsweng ke kotsi ka ntle mono, mme yaba Satane o leka ho timetsa ntho ya bona . . . Ke ba bone ba ema morao mane, lekgatheng leo, ho dumella motho e mong ho kena. Tereilara ya bona, ntho e nngwe le e nngwe ka phaposing eo ya tjha ya eba lehooko. Ke ne ke le teng mono. Ntho feela e neng e le teng, ke a kgolwa, e le Bibele ya kgale e bokwang mme, ke a kgolwa, buka ya ka le ya Moena Osborn. Ntho ka nngwe e tjhele e le lehooko, ka tereilareng ya bona. Ka thonaka Bibele, e le mosidi ha nyenyane feela ka ntle. Ka bolella kgaitsti le moena hore tsatsi le leng, ha Morena a ratile, nka thabela ho tla le ntho eo sefaleng mona, le ho rera ka mohlodithero, “Mahodimo le lefatshe di tla feta, empa Lentswe la Ka le ke ke.” Mohla sohle se fetileng, Lentswe le sa le teng mono. Na ha ho babatsehe ka moo Modimo a baballang Lentswe la Hae kateng? Mme ha o dumella Lentswe leo ho kena ka ho wena, O tla o baballa. Ke hantle.

¹¹ Mehleng ya morwallo. Ke ne ke rera mona bosiu bo bong, ka siya Bibele ya ka. Morwallo wa ‘37 wa fihla bosiu,

mohlomong, ha o haola hara tabernakele; wa phahamisa sefala sona sena, ho se nyolla hantle (mohlang ho se na siling e nngwe ka mona) mme wa e patisa hantle pela siling. Lentswe le le ka tlasa sefala; ho ena le hore e tebe, ya phaphamala, ho e nyollela hantle silinng. Mme ka soka hohle mona, ka mokorwana. Mme yare ha metsi a kokobela, ya theoha mme ya robela hantle mona kgaolong eo ke neng ke e bala, ka mora morwallo. “Mahodimo le lefatshe di tla feta, empa Lentswe la Ka le ke ke.” Ke hantle. O a babatseha. Ha A jwalo na?

¹² Ka botshepehi, ke—ke batla ho sutha mona, ka potlako, hobane ba na le bareri ba bangata hakana ba kgabane. Ke ne ke hopotse ho ba biletsha bohole kalaneng, empa ha re na ditulo tsa bona. Hobane, ke bone ba mmalwa e sa le ke fihla mona, mokguping, mohlomong ba na le molaetsa bosius bona. Re batla ho utlwa ho modisa wa rona, ho tswa ho ba fapaneng, e—e molaetsa oo ba o tshwereng dipelong tsa bona, bakeng sa bosiu bona. Mme ke tla ba mokgutshwane haholo, le ho leka ho bua nthwana e itseng.

¹³ Le hona re qala ntho e nngwe bosius bona, kapa ho etsahala ntho e nngwe bosius bona, ha Modimo a ratile, eo re sa kang ra e etsa ho tloha ke... bophelong ba ka. Ke ne ke e nahanne tsatsi le leng, le ho bitsa Moena Neville, mme a e hopola e le monahano o babatsehang. Ho ena le letomotomo lohole la ho budula diphala, le ho tjodietsa, le ho itshwara jwalo, le ho nwa, le bonyolonyolo ba Selemo se Setjha, le jwalo-jwalo, re tla tla aletareng mme re je selallo, ka kgitla ya bosiu. Ka... Mme e mong le e mong wa rona, e re re sa mamela mantswe bosius bona, ho tswa ho bareri ba fapaneng bana, ha re beng le tshabo e shweletseng.

¹⁴ Jwale, bosiu ba Sontaha se fetileng, ke ntshitse Molaetsa wa Keresemose. Mme yaba ke bolella kereke, ho batho ba tswang Georgia le dibakeng tse fapaneng, “Le se ke la tla,” ka hobane ho tla kgothotsa bana ba bona Keresemose. Ba a... Ba e lebeletse, ke bana feela. Mme ke tla le fumanela diteipi. Jwale, lona ba sa kang ba tla, e—e teipi e ditjehong tsa ka. Tsebisang Moena Woods le bao feela, mme ke tla—ke tla le hlokomella yona, le ho fumana teipi.

¹⁵ Mme jwale, bosius bona, ke batla feela ho bua ntho e le nngwe ena, pele ke bala mohlodithero wa ka.

¹⁶ Mme mohlomong, therong, re tla fihla kwana, ho ella kgitla ya bosiu. Mme ebe re, mohlomong leshome le metso e mehlano, metsotsi e mashome a mabedi pele ho leshome le metso e mmedi, re tla tswa mme re ntshe kosher, e—e Selallo sa Morena, konyana ya paseka. Le ho se bea ka ntle mona, kosher, le ho leboha Modimo, le ho ema aletareng, ka dihlooho tse inameng le dipelo, le ho ja selallo sa Morena. Mme ke nahana hore phaposi e tletse dihatisi ka mono, le jwalo-jwalo. Ha ke

tsebe hore na re a... Ho thweng? Ba tla be ba tswile nakong eo, re tle re se tlole hlatsuo ya maoto, le yona. Mme hosane ke Mantaha, mme batho ba bang, ba tswang ka ntle ho motse, ba na le nako e ngata ho kgutlala hae. Le ho tshepa hobane Modimo o tla le hlohonolofatsa jwale.

¹⁷ Mme lena e ka ba kgetlo la ka la ho qetela ke tla ba le lona, ho fihlela ke kgutla Bophirimela. Ke ya Arizona, mohlomong ho ya Louisana pele, mme e ntoo ba ho ya Arizona le California. Mme hang feela ha ke kgutlile, ke tshepile ho ba le lona hape. Ho fihlela nakong eo, rapelang.

¹⁸ Ha nke ke hlophisa letoto la maeto. Ke a kgolwa ke shebile Moena Borders, bosiung bona, ka kopanong. Hoseng hona ke ile hula maikutlo a hae. Mme o tshwara rekoto, mme o nneile buka tsatsi le leng, ya dimemo tsa mefuta yohle. Empa ka mokgwa o itseng, nakong ena, Moya o Halalelang o itse ho nna, "Eya sebakeng se le seng. Mme ha o qeta mono, Ke tla o bolella ho ya kae ho tloha moo." Le a bona, ho tataisa hantle jwalo, hore ho etsweng kgetlo le latelang. Ka baka leo re tshwanela ho ba haufi le mola, ha A qala a etsa hoo, le a bona, ho tseba feela moo motho a bitsang mme a letile.

¹⁹ Ha se bakeng sa boitlamo ba Selemo se Setjha, hobane ha re di boloke; ha di thused letho, le a di tlola. Ke bone ntate wa ka a lahla leleme leo la kuae, bosiung bo bong le bo bong ba Selemo se Setjha; ho sheba moo a le lahletseng teng, a tle a le thonake tsatsi le hlahlamang. Le a bona? Mme ditaba di batla di dutse jwalo. Re se ke ra etsa maitlamo. Ha re kopeng mohau le lereko, ho kopa mohau wa Modimo.

²⁰ Mme ha ke sa fumane monyetla hape, ho jesa selallo, mohlomong ka ho potlaka lekgatheng leo, ke... Ke lakatsa ho etsa ntho e le nngwe ena; e nngwe ya ditakatso tsa ka ke ho bona Kereke e se nang letheba kapa letsika, eo Moya o Halalelang... Moena Graham, ena e sa le e le tabatabelo ya pelo ya ka; ho bona Kereke e tletseng ka Modimo ha kana, hoo sebe se sa duleng ka ho yona hohle, Moya wa Modimo o se hlahatsa hantle, hohle moo se leng teng. Ke batla ho bona seo.

²¹ Mme ntho e le nngwe eo ke e lakatsang, pono e le nngwe e kgolo e tswang ho Morena eo ke nnileng ka e lakatsa ho tswa ho Morena, O mphile yona hoseng ho hong, e ka ba hora ya leshome hoseng. Mme e kgotsofaditse takatso ya ka. E se e le dilemo le dilemo, ho tloha ke le moreri, ke lakaditse ho bona seo, mme qetellong e etsahetse. Jwale ke motlotlo haholo ho Modimo. Ha ke eso bue letho ka yona, ke e ngotse fatshe feela. Mme ke a tseba hore ke seo e sa le ke se kopa, ka dinako tsohle.

²² Mme jwale ke a rapela le ho tshepela ho Modimo. Mme bosiung bona, botjha, ke nehela bophelo ba ka ho Yena, hodima sefala sa Hae. Takatso e le nngwe e kgolo eo ke ho ikokobetsa ho feta pela Modimo le pela batho ba Hae. Ka ho tseba hore

eo ke e nngwe ya diphoso tsa ka tsa sehlooho, ke ho sebetsana le bongata ha kana, ntho eo e tapile tse ngata ho nna, tse neng di le teng pele. Ke tshepile Modimo ho kgutlisetsa hape thabo eo nkileng ka ba le yona. Ha se hore ke lahlehetswe ke thabo ya ka, tjhe; empa ke re ke batla e fetang moo, ho fetisang, boikokobetso bo fetisang, ho sebeletsa Morena. Isao ena, ke tshepisitse Modimo, ha A ka ntumella ho phela, le ho mpha monate mmeleng le matla, ke tla leka ho ba mohlanka wa Modimo, le moena ho batho, ka pelo ya ka yohle.

Modimo a le hlohonolofatse jwale. Ha re inamiseng dihlooho tsa rona nakwana feela.

²³ E re lefatshe, Ntate, le sa phikoloha ekhweita, ka moo re bolellwang kateng, jwale le tla qala jwale le kgutlela morao...ho tloha letsatsing le le kgutshwane ka ho fetisia la selemo, ho isa ho le le lelele ka ho fetisia. Nakwaneng feela, mme diphala di tla budulwa, batho ba tla howeletsa, ditleloko di tla lla; mme selemo sa kgale se fetile, mme ho fihla selemo se setjha. Ntate, re a O leboha, ha O re dumelsetse ho bona selemo sena sa 1961. Mme re O rapela ho re tshwarela dibe tsa rona tsohle tseo re di entseng monongwaha. Mme ha ho bile le ntho e le nngwe e molemo eo re e entseng, Lebitso la Hao le roriswe. Hobane e ne e se rona, ba se nang tokelo; empa e ne e le Wena, Moya o Halalelang o ileng wa hatella tsela ya Wona bophelong ba rona qetellong, hodima maemo a rona a borabele, le ho etsa ho hong ho hodisitseng Modimo. Re motlotlo ha e le mo A e entse. Ntate, re rapela bosiusing bona hore A tle a re hatelle ka thoko nako le nako, le ho dumella thato ya Modimo ho etswa maphelong a rona.

²⁴ Mme, bosiusing bona, e re dikereke tsa rona e leng dikgaitsedi, badisa ba tsona ba dutse mona; Moena wa rona Graham, le baena ba tswang dibakeng tse fapaneng tsa na ha; Utica, Sellersburg, le Georgetown, hohle moo e ka bang teng. Meya e theko e thata e bokane ho tswa bongateng, esita le Dinaha, bosiusing bona, ho re thusa jubileng e kgolo ena mona eo re e ketekang; mme ba neehetse nako ho bina dithoko, ho rapela thapelo, le ho mamela Lentswe la Modimo. Tlatsa pelo e nngwe le e nngwe. Suthisa pelaelo ka nngwe. Tlosa tshabo ka nngwe. Tlosa mokgathala ka mong. Le ho dumella Moya o Halalelang ho kena dipeleng tsa rona, le ho lema Lentswe. Re be tshimo eo Lentswe le tla wela ho yona, e tla beha ditholwana isao. Fana ka sena, Morena.

²⁵ Nthuse jwale, e sa le nako ya ka, lotho e ntshitse nna kgetlong lena, ho bua. Ke O rapela ho tlotsa mantswe a bolelwang. Mme a ke a tswe a le tlasa tlolo ya Moya o Halalelang, ka ditebello, Morena, ho fihlisa batho, ba sa O tsebeng, ho Wena; mme ba leng teng, ba ke ba fuwe tumelo e feta-fetang, ho sebeletsa Wena. Fana ka sena, Morena. Le ho thusa lentswe la ka, mme ke tshwerwe ke sefuba se sebe, mme

ke katlilwe ke Molaetsa wa dihora tse nne hoseng hona, ke O rapela ho nthusa. Re thuse kaofela ha rona, le ho re lolamisetsa jwale tshebeletso e tla latela le selallo.

²⁶ Hlohonolofatsa kereke ena le modisa wa yona, Moena Neville wa rona, diteraseti tsa yona le batikone, mme ba sebetse ka bokgabane monongwaha ho feta pele. Ho O leboha ka tshebetso ya bona le sebete sa bona. Ka moo ba emeng le nna mohla ke ba hlokileng ho ntshehetsa! Moena Neville le Moena Roy Roberson, le baena bohole ba theko e thata ba ileng ba ema le rona dinakong tsa tlakotsi, mme, tlasa boetapele ba Moya o Halalelang, ba etsa diqeto ka bokgabane ba bo tsebileng. Mme diqeto tseo ba di entseng, di pakilwe di le thatong ya Hao, hobane O hlohonolofaditse diqeto tsa bona. Modimo, tswelapele ho ba thusa. Re thuse kaofela ha rona, mmoho jwale. Re kopa Lebitsong la Jesu. Amen.

²⁷ Jwale, ho lona ba nkang mehlodithero; le ho tshepa hobane le tla be le nthapella. Mme ka nakwana e seng kae, ke rata ho hulela maikutlo a lona karolwaneng ya Lengolo le fumanwang Bukeng ya Baahlodi, kgaolong ya 6, ho qadisa ka temana ya 7. Ke rata hore le mamele ka kgutso, mme le mamele Lentswe.

²⁸ Le a nkutlwka ka morao, ho lokile? Phahamisang matsoho a lona, ha le kgon. Ke botle. Mme ha ba ka sheba, e ka bang mang enjenere ya maeke wona, a ke a shebe hore o fetsisa ka nepo. Na diteipi di a kena?

²⁹ Baahlodi, kgaolo ya 6, temana ya 7. Jwale mamelang ka hloko, hobane ke tliro lebisa tabeng ena nakwaneng e seng kae.

*Etse hobane, bana ba Iseraele ba howeletse ho
JEHOVA ka baka la Bamidiane,*

*JEHOVA a romela bana ba Iseraele monna wa
moporofeta, a tla a re ho bona, Ho itswe ke JEHOVA
Modimo wa Iseraele, Ke le nyolotse hodimo
Egepet...ka le ntsha tlung ya bohlanka;*

*...Ka le namolela matsohong a Baegepet, le
matsohong a bohole ba neng ba le tshwenya...ka ba
lelekisa pela lona, ka ba ka le nea lefatshe la bona;*

*Mme ka re ho lona, Ke nna JEHOVA Modimo wa lona;
le se ke la tshaba medimo ya Baamore, bao le ahileng
naheng ya bona: empa ha le a ka la mamela lentswe la
ka.*

*Yaba lengeloi la JEHOVA le tla, la dula tlasa sefate sa
terebinthe se Ofra...e leng sa Joase Moabiesere: mme
Gideone mora hae o ne a pola koro sehatelong, hore a
tle a e patele Momidiane.*

*Lengeloi la JEHOVA la mo hlahela, la re ho yena,
JEHOVA o na le wena, monna wa senatla.*

Gideone a re ho lona, Oho Monghadi, ha ekaba JEHOVA a ena le rona, tseo tsohle di re hlahetseng? e kae mehlolo ya hae kaofela, eo bontata rona ba re boleletseng yona, ba re, Na hase JEHOVA ya re nyolotseng Egepeta? jwale JEHOVA o re furalestse, o bile o re neetse matsohong a Bamidiane.

Yaba JEHOVA o reteleha ho yena, a re, Eya ka matla ana a hao, o namolele Baiseraele matsohong a Midiane: ha ke re ke o romile na?

- ³⁰ Ha ho kgahlile Modimo, ke lakaditse ho qotsa mohlodithero mono, hodima, ke dumela hobane...nka re temaneng ya 14, moo E itseng, *Ha Ekaba Modimo A Ena Le Rona, E Kae Mehlolo Yohle?*

Jwale, bohole re tlwaetse Baahlodi, ba Iseraele.

- ³¹ Le kamoo ba entseng Baiseraele kateng; Bafilesta, Bamidiane, Baamore, le ba bang bohole ba fapaneng ba keneng eka ditsie mme ba ja tsohle tseo ba neng ba di ruile, le ho tsamaya le tsona, le ho ikela. Empa, na le lemohile, ba ke ke ba etsa jwalo ho fihlala Iseraele e wele ho Modimo pele.

- ³² Diabolosi a ke ke a o hata ka leoto, ho o hlokofatsa, ho fihlala o tloha ho Modimo pele. O tshwanela ho hopola seo pele. Ela hloko ha ntho efe e hlaha, bona hore o sa le Tumelong na, kapa tjhe, bona hore na o sebakeng se nepahetseng le Modimo; ebe, hopola, Diabolosi a ke ke a o ntsha kotsi, o ka ho Kreste.

- ³³ Mme sebakeng sena mona, re sa tswa tlohela...Dilemo tse mmalwa pele ho mona, ha ba le moporofeta wa mosadi, Debora; le Barake. Le kamoo a porofetileng le ho ba bolella hore ba etseng, mme ya hlaha ka nepo; Barake, mohlabani e moholo; le kamoo ba qapileng pina, ya tlholo hodima sera. Empa hang feela ha ba tswa qawa, ba kgutlela qhefe-qhefeng eo ba keneng ho yona hape.

- ³⁴ Ha ekaba e se tshobotsi ya kereke kajeno! Hang feela ha e tswa qawa, e kena ho e nngwe hape. Empa nako ya kgato e fihlile. Mme ho a tshwana le jwale, nako ya kgato e fihlile. Nako e ne e fihlile, mohla ho bapala kereke ho kgaoditseng, ho Modimo. Ho bapala kereke ha ho sa le yo. Re tlamehile ho ikakgela mosebetsing. Mme ke tshepa wona Modimo oo o tla bea taba ena pelong ya batho bosius bona, hore ke nako ya ho kgaotsa ho bapala kereke, ho bapala bodumedi, ho bapala ho loka, jwale ke nako ya kgato.

- ³⁵ Jwaleka ha ke buile hoseng hona ka temana ya seo Tswalo e ntjha e neng e le sona, le kamoo re e fihlelang, ruri taba eo e sa ntse e thophothela pelong ya lona. Jwale ho fihlile nako ya ho nka kgato hodima seo o se tsebang e le Nnete. O ke ke wa nka kgato ya tumelo pele o tseba seo o se etsang. Pele o tlameha ho tseba seo o se etsang, pele o eba le tumelo ya ho se etsa.

³⁶ Motho o kile a re ho nna, ngaka e tumileng, a bua ka mohlololo o hlahileng hara... motho ya kulang. Mme a re ho nna, "Moreri, ana ha o dumele, hore ha o ka laela batho ho tswa ho ya thetsa sefate kapa palo, ntho yona eo e ka etsahala?"

³⁷ Ka re, "Tjhe, monghadi." Ka re, "Hobane o ke ke wa ba le tumelo, ka ho ama sefate kapa palo."

³⁸ Tumelo ha e lokotsehe ha kaalo. E tlameha ho tshetlehwa hodima ntlhakemo e tsitsitseng. O tlameha ho tseba letho malebana le seo o beang tumelo ya hao hodima sona, pele o ka ba le tumelo ho sona. Ka baka leo pele re tshwanetse ho tseba *jwang* le *eng*, seo takatso ya Modimo e leng sona, seo leano la Modimo le leng sona, le tsela ya ho atamela Modimo ka leano leo. Mme ke moo re ka tsamayang ka sebete ho ya Teroneng ya Mohau, le ho rapedisisa ka leano leo re le tshepisitsweng.

³⁹ Jwale, ba ne ba ntse ba bapala kereke. Hang feela ha ba qawa ha nngwe... Modimo o no o ba lopolotse. Yaba, ho ena le ho tloha ho ya sebeletsa Modimo ka nneta, ka ho bona letsoho la Hae le matla, ba boela ba qawa dinthong tsa lefatshe. Mme jwale ho ne ho fihlile nako, mohla, Modimo a memelang kgefutso. Mme e tshwanetse jwalo.

⁴⁰ Mme ke nahana e le nako ya ho memela kgefutso jwale. Re tshopahantse Lentswe la Modimo, ho kgohlelana le mokgatlo ka mong o leng teng lefatsheng. Leano ka leng leo motho a rerileng ho le etsa. Re tshopahantse Lentswe ho Le etsa *tjena*, le ho tshopahanya Lentswe ho Le fetola ka tsela *yane*, le ho Le tshopahanya ka tsela e itseng ho Le kgohletsa leanong. Empa nako e fihlile, ho kgefutsa, ho emisa ho bapala kereke. Ho fihlile mohla batho ba reng, "Ha o ka fumana Moya o lekaneng feela, ho hobela Moyeng; ha o ka fumana ho lekaneng, ho bona masedi ka pela mahlo a hao; kapa maikutlo a tjhalametsa mokokotlong wa hao, kapa tthisimoho, kapa ho tsokotseha, boikutlo bo itseng; o na le Wona!" O na le ntho e nngwe; empa, feela nke ka bolela hore o ne o ena le eng, pele ke bona tholwana eo e beileng.

⁴¹ Yare re sa haola ho yona, hoseng hona, o ke ke wa lebella lesea ho tswalwa e le monna. Le tlameha ho holela nqa eo. Mme ka ho Kreste re a hola, ho fihlela tekano e tletseng. Ntho e nngwe... E seng motho ya sokolohang bosius bona, mme hosane o ya rera Evangedi. Re a hola ho ba banna, tekanong ya Kreste.

⁴² Jwale, re fumana hobane ha batho ba Modimo ba kena kgathatsong, ka mehla Modimo o romela moporofeta ka Lentswe la nneta, ho ba ntsha. Ha ho eso be le nako moo batho ba Modimo ba kenang kgathatsong, Modimo a sa ba romelle Lentswe la Hae. Mme Lentswe la Hae, kamoo re neng re e tshwere hoseng hona, le tla ho baporofeta. Mme kamoo o e lekang kateng, ke ho fumana hore e ya ka Lentswe na. Ha e fela e ya ka Lentswe, ke moo Lentswe la Modimo le phelang.

⁴³ Jwale bongata bo ka re, “*Enwa* ke moporofeta wa kereke ya rona.” “*Enwa* ke moporofeta wa kereke ya rona.” Mme bobedi ba bona, ba thulana, e mong kgahlano le e mong, phoso e tlamehile ho ba teng.

⁴⁴ Bohle re loketse ho bua ka ho tshwana. Ebe ha re bua, e seng kgahlano, empa hantle ho ya ka Lentswe lena. Ke kamoo moporofeta wa nnete a lekwang, hore o tshwere Lentswe na. Bibele e bitse, “Bopaki ba bona ha bo sa ye ka molao le baporofeta, Lesedi ha le yo ka ka ho bona.” Ke hantle. E tlameha ho ya ka Lentswe.

⁴⁵ Mme Modimo ka mehla, lebakeng ka leng, o romela batho mohlanka wa nnete, moporofeta wa nnete ya tla hlahisa Lentswe la nnete la Modimo. Mme Lentswe la Modimo ke lona le lopollang batho, ka mehla.

⁴⁶ Jwale, hola re ka kgutla mme ra bala temaya ya 7 ho fihla ho ya 10, re a fumana, ka mono, temaneng ena ya 7 ho fihla ho ya 10, hobane Iseraele e ne e furaletse Modimo, mme e boetse lefatsheng hape. Mme mono, ha a hlahe kae-kae, le lebitso la hae ha le hlahiswe. Ha ke kgolwe moporofeta a ne a tsotella lebitso la hae. O ne a tsotella ntho e le nngwe; Modimo o ne a mo tlotsitse! A sa etse phapang hore o ne a nnkuwa e le e mong wa diphutheho tsa bona tsa bodumedi, kapa ntho e nngwe e sele, hore e ne e le bishopo kapa arekabishopo. Ntho feels a na e thahasella, e ne e le molaetsa oo o dutsgeng pelong ya hae. Mme a memela batho pakong, le kutlwisisong ya hoba Modimo wa bona ke Modimo o matla le Modimo o lopollang, Modimo wa mehlolo, o ba phamotseng matsohong a Baegepeta, ho bula Lewatle le Lefubedu, le ho ba fepa felleng, le Modimo o matla O nong o ka amoha motho e mong lefatshe le ho ba nea lona. Amen! E ne e le moporofeta wa nnete eo. O ne a tlotsitswe, mme e ne e le Kodu ya Modimo bathong bao. O ne a bua, hore e tlameha ho ba jwalo, hoba ba ne ba kene kgathatsong.

⁴⁷ Bamidiane bana, le Baamore, le ba jwalo, ba ne ba ttile ba ja lefatshe la bona lohle. Mme ka hona sera se ne se phepheditse, mme sa tlameha ho kgahlanyetswa! Mara a bona a sitwa ho e etsa, le baprista ba bona ba sitwa ho e etsa, le dikereke tsa bona tsa sitwa ho e etsa. Ka hona, ya qosa Lentswe la Modimo, ho kgahlana le phephetso ya hae.

⁴⁸ Kajeno sera se a bua. Sera se leka ho bolela ho re, “Matsatsi a mehlolo a fetile. Hore, ha ho ntho e kang kolobetso ya Moya o Halalelang. Mme Hona e mpa e le boikutlo. E mpa e le phudueho.” Ka hona, sera se phepheditse, mme phephetso ya sona e tshwanela ho kgahlanyetswa! Mokgwa o le mong oo re ka kgahlanang le phephetso ya letsatsi, mohla dihlopha tsa bodumedi di hwewhang batho le—le ho ba setetsa mokgatlong *wona*, mokgatlong wa *wane*; ho dumella basadi ba bona ho kuta moriri wa bona le ho tlola meikapo; le monna, maphelo a

mefuta yohle, ho phela e le diteraseti le batikone; le badisa ka kerekeng, hoba ba ena le Ph.D. kapa LL.D. e le sekala. Jesu ha eso qose motho ho fumana hoo.

⁴⁹ Tlhoko ya Jesu e ne e le, “Emang motseng wa Jerusalema le tle le be le tlatswe ka Matla a tswang Hodimo, ke moo le leng dipaki tsa Ka.” Ke hona ho kgahlanyetsang phephetso ya hae. Hoo ho kgahlanyetsa phephetso ya sera. Hoo ho e kgahlanyeditse letsatsing leo. Ho tla e kgahlanyetsa letsatsing lena.

⁵⁰ Jwale ke batla hore le ele hloko. Ho 7 ho isa ho 10, re bona ho fihla moporofeta. Ho tloha ho 1 ho isa ho 7, re bona batho ba kweneha. Mme ho tloha ho 7 ho isa ho 10, re bona ho fihla moporofeta mme a fa batho sehlare. Lemohang, ha re tsebe moo a tswang; ha a re ho na le monna, Mofarasi, e bileng moprista nakwana. Ha e a hlahisa metheo ya hae. Baporofeta bao, ba hlaha ba sa tswe kae-kae!

⁵¹ Shebang Elia. Elia e ne e le wa ho qetela, le wa botshelela, ho baporofeta ba baholo, ho baporofeta ba matla. Seo re se tsebang ka motheo wa hae hase letho. Ha re tsebe sekolo seo a se keneng. Ha re tsebe lelapa leo a tswileng ho lona. Ntho feela eo re e tsebang, hore, Modimo o ne o ena le yena! Mme o tlide, a batla a ikela ka mohlolo jwaloka ha a tlide. O tswile felleng a sa tswe kae-kae, mme a kgutlela felleng, mme a hlwibilwa ke koloi ya moyo, le ho iswa Mahodimong, ka Mollo. O tlide ka mohlolo, o tsamaile ka mohlolo. A se na metheo ya thutomodimo. Ha re tsebe moo a tswileng teng, ntatae e ne e le mang, mmae e ne e le mang, baena ba hae le dikgaitseedi e ne e le bomang. Ntho feela eo re e tsebang, e ne e le monna wa Modimo. Modimo wa mo hotolla nqalong e siyo, le ho mo sebedisa, le ho mo nka ho mo isa Nqalong e itseng, Sefahlehong sa Hae. E ne e le monna wa Modimo.

⁵² Mme moporofeta ke enwa a e tswa, bakeng sa hora eo, mme a ba fa Lentswe la Morena. Hopolang, A se ke a ba fa thutabomodimo e itseng e entsweng ke motho. A re, “Ke nna Morena ya le nyolotseng Egepeta, ho bontsha letsoho la Ka le matla, ho bontsha Matla a Ka.” Ke a kgolwa Gideone o ne a dutse hantle mono a mo mametse! “Ke nna Modimo o entseng dintho tsena. Mme tsena tsohle Ke di etseditse lona, mme leha ho le jwalo ha le a ka la mamela melao ya Ka. Hodima sena sohle, ha le a ka la etsa letho.”

⁵³ Jwale ke batla hore le lemohe ntho e nngwe e ka le kgothatsang. Hang ka mora molaetsa wa moporofeta eo, Morena a hlaha sebaeng. Amen! Kapele hoba a ntshe molaetsa wa hae, Morena a hlaha tlasa sefate. Morena a tla, ka mora molaetsa wa moporofeta, a dutse tlasa sefate. Moporofeta a ntsha... Batho ba ne ba wele, ba kgelohela mekgeng ya bona. Modimo wa romela moporofeta wa Hae. Hang hoba moporofeta a qete ka molaetsa wa hae, Morena a sala molaetsa wa moporofeta morao, bakeng sa tokoloho!

⁵⁴ Oh, re phela nakong e bohlokwa-hlokwa! Hang ha moporofeta a tloha sebaeng, ha etsahalang? Morena a fihla sebaeng! Kapele ha Johanne a tloha sebaeng, Morena a fihla sebaeng! Ho hlolla haholo ka moo Modimo a sebetsang kateng, empa O a e etsa, o sebetsa ka tsela e mohlolo.

⁵⁵ Re bala Lengolo mona, moo Gideone, a tshohileng, ka ntle sehatelong, a pola koro e lekaneng, pele Bafilesta kapa Bamidiane ba mo kgaoletsa. Yena le ntatae, ba le ka ntle mono ba kgwahlapisa dijonyana tsa bona tsa mariha, ho pola, ka sephiring, ba tle ba se ba fumane. Hobane, ba ne ba hlahla eka ditsienyane, mme ba hlothe seo ba neng ba se ruile.

⁵⁶ Diabolosi o etsa jwalo. Re ka qala kerekana, ntho ka nngwe e tsamaya ka thello, (ke bareri ba bakae ba sa tsebeng sena e le nnete?), nakong eo ntho ka nngwe e batlang e tsamaya ha monatjana, moikaketsi wa kgale o tla kena sehlophenh seo mme a se hahole dikotwana. Ke hantle, ho amoha motho kereke hantle, ha a ka kgona ho e etsa. Le a bona, ke Diabolosi eo, ho kena jwaloka ditsienyane le ho nka se abilweng. Jwale ha . . .

⁵⁷ Ruri Gideone e ne e le monna wa Mangolo. Eitse ha Lengeloi la Morena le re ho yena . . .

⁵⁸ Mme ha le ka lemoha, e ne e se Lengeloi la Morena mona. E itse, "Yaba Morena," tlaku e kgolo M-o-r-e-n-a. E ne e se Lengeloi. E ne e le Modimo. E ne e le e—e theofani ka ho monna, ka sebopheho sa Modimo, jwaloka e hlahetse Abrahama morao feelleng, mme eka monna. Ka baka leo, ka ho ba Moromuwa, E ne e le Lengeloi la Morena.

⁵⁹ Mme A ipontsha yena. Mme A re, "Wena monna wa senatla," hore O tla mo nka, mme a lokolle Iseraele ka yena.

⁶⁰ Mme Gideone a botsa potso eo. E le monna ya Mangolong hakakang! Ke mofuta wa monna oo Modimo a tl Lang ho wona, motho ya tsebang. Gideone o itse, "Ha ekaba Modimo a ena le rona, ha ekaba O le Moromuwa, e kae mehlolo eo moporofeta a re boleletseng yona?" O tsebile, hohle moo Modimo ileng, mehlolo ya Hae e Mo setse morao. O tsebile hoba hohle moo Modimo a tla ba teng, mehlolo e tla ba teng mono.

⁶¹ Mme o ka lebella Modimo jwang, kajeno, ho sebetsa hara batho ba sa dumeleng mehlolong? Ho ka ba jwalo jwang?

⁶² Mme O mmitsitse "monna wa senatla." Ho re, "Jwale, ka sena, o tla lokolla Iseraele."

⁶³ Jwale, e ne eka monna ya dutseng mono, mme ehlile e ne e le Monna. Mme e ne eka Yena, mme a re, "Le kgale, Morena wa ka, ha ekaba Modimo a ena le rona, horeng koduwa ena e re wetse hodimo? Mme e kae mehlolo eo re bolellwang ka yona? Di kae dintho tseo Modimo a neng a di etsa?"

⁶⁴ Jwale ke eo tsela e ntle ho tshepa ha ekaba moromuwa o nepile, kapa tjhe. Ha a ena le sebopheho sa borapedi, o tla latola

Matla ao a ho etsa mehlolo eo. Ha e le moromuwa ya tswang ho Modimo, a ke ke a bua ka yona feela, empa o tla ba le yona; ho e hlahisa, le ho supa hobane Modimo eo a buang ka yena o na le yena le ka ho yena.

⁶⁵ O itse, “Ha Modimo a ne a ena le rona, e kae mehlolo ya Hae yohle e meholo? Hoba, re a utlwisia...” Mamelang kamoo e yang ka Lengolo, Gideone a neng a dutse kateng. Ka mantswe a mang, o itse, “Ha ekaba... Re utlwisia hobane Modimo ke Modimo o moholo wa diketso tse kgolo. Ke Modimo o moholo wa mehlolo. Mme ha ekaba A eme le rona, mme ha ekaba A ena le rona, mme ha ekaba esale Yena maobane, kajeno le ka ho sa feleng, mehlolo ya Hae nka e bona kae? Ke kae moo nka bonang Modimo enwa motsamaong? O ho kae, ha ekaba A re eme le rona?”

⁶⁶ Monna wa senatla a kgona ho kgutlela Lentsweng la kgale, le ho tseba hobane Le nepile, hobane o tsebile sena, hore, Modimo ke Boleng bo ka hodima hlolleho. Mme hohle moo Boleng bo ka hodima hlolleho bo leng teng, O tla etsa dipontsho tse ka hodima hlolleho, hoba tse ka hodima hlolleho di ahile ka ho Yena. O ke ke wa itshwasolla ho yona feela.

⁶⁷ O ka ema moyeng jwang, moya o sa foke? O ka kena metsing jwang, o sa kolobe? Metsi a kolobile. Ke khemikale ya wona eo. A kolobile! Mme ha o kena metsing, o tla koloba. Hantle!

⁶⁸ Mme ha o kena ka pela Sefahleho sa Modimo, tse ka hodima hlolleho, ho tla hlaha mehlolo e ka hodima hlolleho le diketso tse ka hodima hlolleho tsa Modimo o ka hodima hlolleho.

⁶⁹ Ha ho le jwalo, o itse, “E kae tshebetso, e kae mehlolo, ha ekaba Modimo a ena le rona?”

⁷⁰ Ho bokwe! [Moena Branham o opa diatla, hane—Mong.] Ke yona! Le a bona, moo Modimo a leng teng, mehlolo e teng. Moo Modimo a leng teng, pontsho ya Modimo e teng mono. Le a bona?

⁷¹ Mme Gideone, ka ho tsepama Mangolong, o itse, “Di kae dintho tsena?” Ka mantswe a mang, tjena, “Ke monna, wa dilemo tse bang mashome a mahlano,” a ka rialo. “Mme ke ba utlwile ba bua ka Modimo o entseng mehlolo. Mme ke ile kerekeng, mme ke dumetse baprista. Mme ke dumela baporofeta. Mme ke dumela Lentswe le ngodilweng, mangolo wohle a phuthilweng. Mme ke badile mangolong a phuthilweng moo, Modimo, ha A kena hara batho ba Hae, ntho e nngwe e etsahetse.” Mme Gideone ha a ka a tseba empa hore monna o ne a dutse feela mono tlasa sefate sena sa terebinthe. Amen! Ke phetho seo a se tsebileng, E ne e le monna. O itse, “Jwale, ha ekaba Modimo a ena le rona, e kae mehlolo ya Hae? Re batla ho e bona.”

⁷² Taba eo e kgema le Lengolo ha kakang! Hobane, moo se ka hodima hlolleho se leng teng, Modimo le pontsho ya Hae ba tla

teng le Yena. Moo Modimo a leng teng, pontsho ya Modimo ena le Modimo. Re tseba seo. Ha ekaba A le ka hara batho ba Hae, ba tla etsa dipontsho tsa Hae. Hantle feelsa ka nepo.

⁷³ Ke potso eo Gideone a bileng le yona, “Ee, Modimo o kae? Ha ekaba Modimo a le teng, ha ekaba Modimo a ena le rona, a nke ke bona moo pontsho ya Hae e leng teng. Re bolellwa hore O hlile o a e etsa. Mme ha ekaba mosebetsi o motonana ona o le ka pela ka...”

⁷⁴ Mohlomong mono ho eme Monna eo ya hodileng, E ka Monna ya hodileng. Bibebe e re O ne a nkile lere letshohong la Hae. Bala ho tswelapele, kgaolo ya 6, ha o ya hae, kapa hosane ka nako e nngwe.

⁷⁵ O ne a nkile lere letshohong la Hae; Monna ya hodileng, a shebeha jwalo, a dutse tlasa sefate. Mme A mmitsa, “monna wa senatla.” Mme A re Modimo o tla etsa ntho ena. Mme A re, “Modimo o na le wena.”

⁷⁶ A re, “E kae mehlolo ya Hae he? Ha ekaba Modimo o ka hodima hlolleho a le teng mona, e kae mesebetsi e ka hodima hlolleho ya Modimo?”

⁷⁷ Taba eo e ka buuwa ha bonolo bosiusa bona hara dikereke tsa rona. “O kae Modimo oo o kileng wa phela? Na O shwele? Na O falletse? Na O phalletse? Na O etile?” Tjhe, monghadi.

⁷⁸ E sa le Yena maobane, kajeno, le ka ho sa feleng. Mme ha re ipolela re le ba Modimo, ha re boneng moo Modimo a leng teng. A re boneng dipontsho tsa Modimo. Ha ekaba tabernakele ena e emetse Modimo, a re boneng Modimo a tsamaya hara rona. A re boneng meya e tswallwa Mmusong. A re boneng maphelo a otlolwa. A re boneng bakudi, le difofu, ditsebetutu, a re boneng mesebetsi ya Hae e meholo e etswa. Modimo hara rona!

⁷⁹ “Ha ekaba Modimo a eme le rona, e kae mehlolo ya Hae?” O botsitse potso.

⁸⁰ Jwale, ha ekaba Modimo a ena le batho ba Hae, le ka ho batho ba Hae, a ke ke... motho eo a ke ke a ithusa ho etsa letho haese se tshwanang le seo Modimo a se entseng. Hobane, ha e sa le motho eo, ke Modimo ka ho motho eo. Ha monna eo a etsa sebe, e tla ba Modimo ha a yo ka mono. Ha a rata lefatsho, e tla ba Modimo ha a yo ka mono. Mme re a tseba hobane Modimo ha a kopane le sebe. Jwale ke tla le fa Lengolo la sena, nakwaneng feelsa.

⁸¹ Jesu, mohla a leng lefatsheng, o ne a botswe potso eo. Ba batlile ho tseba, “Wena, o leng Motho, mme o Iketsa Modimo?”

⁸² Mohla A fodisang motho ya tshwerweng ke palsi, O itse, “Dibe tsa hao o di tshwarelw.”

⁸³ O itse, “Jwale be butle motsotsotso! Wena, o le Motho, o tshwarela dibe?”

⁸⁴ O itse, “Hore le tle tsebe hobane Mora motho o na le matla lefatsheng, a ho tshwarela dibe, kapa ho fodisa; ho bonolo ke hofe, ‘Nka diphathe tsa hao mme o tsamaye,’ kapa—kapa ho re, ‘O ke o tshwarelwé dibe tsa hao?’” Mme yaba O bua le monna, mme a ema mme a ikela.

Mme Bafarasi ba ile ba Mo botsa.

⁸⁵ Mme Jesu o itse, “Ekare ha le sa dumele ho Nna, dumelang dipontsho tseo Ke di etsang.” Le a bona, ba ne ba boleletswe hobane Moporofeta o tla ba teng, ya kang Moshe, a hlahe, mme E tla ba Messia. Mme O itse, “Ekare ha Ke sa etse mesebetsi ya Ntate wa Ka, le se ke la dumela ho Nna; Ke phoso. Empa ekare ha Ke etsa mesebetsi ya Ntate wa Ka, mme le sa dumele ho Nna, le mpe le dumele mesebetsi. Mesebetsi e etsang? Ke yona e le bolellang hore Ke mang. E paka ka Nna. Ke dipaki tsa Ka. E seng ditshwanelo tsa Ka, hore Ke setho sa kereke ya Presbeteriene, kapa Pentekosta, Nka bontsha setlankana sa Ka sa botho; empa mesebetsi eo Ke e etsang, dipontsho tsa Modimo, dipontsho tsa Messia, ke tsona tse Mpakang.”

⁸⁶ Jesu o boletse, ho Mohal. Johanne 14:12, ha ekaba le tla ngola Lengolo fatshe, Mohal. Johanne 14:12, “Ya dumelang ho Nna, mesebetsi eo Ke e etsang o tla e etsa le yena.” Amen!

⁸⁷ Ke eng, baena? Ha ekaba Modimo a eme le rona, e kae mehlolo ya Hae? Ha ekaba Modimo a le ka ho rona, molato keng ka rona he? Phoso e teng kae-kae! E.

⁸⁸ Jesu o itse, “Ekare ha le sa dumele ho Nna, seo Ke se buang; shebang se Mpakang, hobane ke tsona tse Mpakang. Morena Modimo wa lona o itse, ‘Ho tla hlaho moporofeta ya jwaloka Moshe. Mme mang le mang ya sa utlweng Moporofeta enwa, o tla kgaolwa bathong.’ Messia o ne a tla ba le pontsho e Mo latelang. Mme ekare ha pontsho eo ya Messia e sa Ntatele,” Jesu o itsalo, ka mantswe a mangata, “le se ke la dumela ho Nna. Empa ekare ha pontsho ya bo-Messia e Mpaka, le mpe le dumele pontsho. Hobane, ha o nahana hore Ke fositse, pontsho yona e nepile hobane e kgema le Lengolo.” Alleluia!

⁸⁹ Ke hona moo Gideone a na a batlile ho ya teng. Ke hona moo Gideone a na a eme teng. “Oh, ha ekaba ho ena le Modimo o nang le rona, re batla ho bona pontsho ya hobane Ke Modimo, hore E sale wona Modimo oo, hobane O tla etsa dipontsho tse tshwanang.” Modimo o entseng?

⁹⁰ Gideone a re, “Butle, mme ke tla ya lata nthwana, nyehelo.” Mme a tswa a ba a hlaba kgomo, kapa konyana, mme a e bedisa. Mme a tlisa bohobe mme a tlisa konyana, mme a e bea fatshe.

⁹¹ Mme Lengeloi la re, “Ke tla ema mona.” Le leke dintho tsohle. E leke ka Lentswe. Mme a re, “Ke tla ema mona,” mohlomong dihora tse pedi kapa tse tharo.

⁹² Gideone a tswa ka moro le bohobe, le ka nama. Mme Lengeloi la re, “Jwale ka sena o tla utlwisia. Sena se tla e kgodisa.”

⁹³ Mme a tshollela moro fatshe, e le nyehelo ya seno. Mme a nka bohobe le nama, mme a di bea hodima lefika moo a neng a polela teng.

⁹⁴ Mme a tshwara molamu letsohong la Hae, eka Monna ya hodileng, lere, mme a se ama. Mme eitse ha A se ama, mosi wa ipetsa, mme sehlabelo sa tjha. E ne e le eng? O ne a mo kgutlisetsa Lengolong, ho kgodisa seo A neng a le sona, wona Modimo o nong o ena le Elia hodima Thaba ya Karmele!

⁹⁵ Yena eo ke buileng ka Yena hoseng hona! Ha o robatsa moya wa hao hodima aletare ya Hae ya koporo ya kahlolo, ho etsahalang? Ha ekaba esale Wona Modimo oo, O tla amohela sehlabelo! O se hlahisitse ka botshepehi hodima aletare ya Hae, O tla tjhesa sehlabelo seo, mme lefatshe le tla tloha ho wena. Ke mosi feela o tla fefoha. Sehlabelo seo se tla timetswa. E.

⁹⁶ “Ha ekaba O le Modimo, mme O le Modimo wa Bibele, eo bontata rona ba bolelang hobane o entse mehlolo, e re ke O bone o etsa mohlolo, kapa e re ke bone mohlolo wa mofuta, ke tle ke tsebe hobane Modimo o kopane le nna.”

⁹⁷ Jwale e re ke bue sena. Ha ekaba Modimo o ituletse e le Modimo, ha ekaba Modimo o ituletse e le Yena Modimo wa matsatsi a fetileng, ha o a tlameha ho nyoloha le ho tsukutla letsoho le moreri, ha o a tlameha ho nyoloha le ho ngodisa lebitso la hao bukeng. Dintho tseo di itoketse; ha ho letho kgahlano le yona. Ebe o a kgutla o ba leloko la kerekke, lebitso la hao le ngotswe bukeng; mme ba o nee lengolo, mme o le jare. Hang feela ha ntho e tsamaya ka phoso mono, o phatloha jwaloka ntho-eo-ke-sa-e-tsebeng, mme o a le nka o le isa kerekeng e latelang. Mme ka potlako ha ntho e tsamaya ka lekeke hodimo mono, ebe o ya le lona kerekeng e latelang. O a bona, ha o a sebetsa ka tshwanelo lebakeng la pele. Ha ekaba Modimo a ituletse e le Modimo, aka rapalatse moya wa hao o tletseng sebe aletareng ya Hae, mme O tla o ama ka Lentswe la Hae le Matla a Hae. Mme lefatshe le tla be le tswile ho wena, mme o tla ba mmopuwa e motjha, ha ekaba A ituletse e le Modimo.

⁹⁸ E ne e le Modimo wa Testamente ya Kgale. E ne e le Modimo wa Testamente e Ntjha. Esale Wona Modimo oo kajeno. “Maobane, kajeno, le ka ho sa feleng.”

⁹⁹ Mme o a tseba lekgatheng leo, botebong ba pelo ya hao, hore mosebetsi o ka hodima hloleho o entswe ke Boleng bo ka hodima hloleho. Athe pele o kile wa nwa, le ho tsuba, le ho bua leshano; mme lona basadi la rata lefatshe hakana, wa nna wa tlola meikapo wa hao, le ntho ya hao e telele...kapa moriri o sekutwana, le ho etsa dintho tse ding tseo o di entseng; mme o

fumana hobane ntho e nngwe e a etsahala, eo matemona ohle a diheleng a ke keng a boela a o etsisa yona. Ntho e nngwe e etsahetse, Modimo wa mehlolo o sebeditse!

¹⁰⁰ O ile a etsang? O fetotse pelo ya hao e soto, ho fetola ditakatso tsa hao, ho fetola semelo sa hao. Lentswe le ka hodima hloleho, ka Modimo o ka hodima hloleho, o fetotse sebopuwa sa nako ho ba sebopuwa sa Bosafeleng. Amen! Ho honya lefatshe ho wena, le ho kenya Kreste ka ho wena, tshepo ya Kganya. Mme o tletse Moya wa Hae, mme o itokiseditse ho kopana le Yena.

¹⁰¹ Modimo e le Modimo; e kae mehlolo ya Hae? Ha ekaba Modimo a ena le rona, e kae mehlolo ya Hae?

¹⁰² Ha ekaba Modimo a ena le kereke ya Methodise, hobaneng basadi bohole ba sa ntse ba poma moriri? Ha ekaba Modimo a ena le kereke ya Baptise, hobaneng he modisa a sa ntse a tsuba disakrete, bongata ba bona? Hobaneng ba sa ntse ba latola Matla a—a Modimo, ho fodisa bakudi, le ho tsosa bafu, le ho bua ka dipuo, le ho hhalosa dipuo, le dineo tsa boporofeta? Hobaneng ba sa ntse ba e latola, ha ekaba Modimo wa Testamente ya Kgale le Modimo wa Testamente e Ntjha esale Modimo o tshwanang? Ha ekaba Modimo wa Testamente e Ntjha, Moya o Halalelang, esale wona Modimo oo Mapentekosta a o boledisang, hobaneng ba sa heletse marako a bona a karohano le ho ngangisana, le ho ba Bakreste ba tswetsweng labobedi? Ehlide. Tjhe, ebile e mong ha a buise e mong. Le a bona, sehlabelo ha se eso tjheswe. Ba feta hara maikutlo, ba entse sohle seo sa bona. . . . Ho haola jwalo le mengwaha, tlasa medimo ya diseto, ba ne ba kenwa ke maikutlo.

¹⁰³ Empa Modimo wa yona—wa yona Bibebe, ke wona Modimo, yena maobane, kajeno, le ka ho sa feleng, o tjhesa lefatshe le diphapang tsohle, ho re etsa dibopuwa tse ntjha ka ho Kreste. E. Jesu o itse, “Tsena di a paka mme di le bolella hore Ke Mang.”

¹⁰⁴ Taba ke hobane, lebaka leo re nang le dintho tsena tsohle, ke hobane re sa ntse re dumella diphapang tsa dihlopha tsa bodumedi, ditumelwana, dikgang, le botumo, le matemona a lefatshe, ho re foufaletsa Nnete e tiileng ya Modimo. Ke hantle.

¹⁰⁵ Batho ba bangata ba thetsitswe, ka ho amohela Moya o Halalelang; jwaleka ha ke boletse, ba tshwere dithuto kajeno, tse kang dikobo tsa Elia, le—le le ntho ena yohle, Bara ba Modimo ba bonahaditsweng, le mekga ena yohle e fapaneng, le jwalo-jwalo, lefatsheng kajeno. Batho ba wela ka bofou mono, mme ba fete hara mofuta wa maikutlo, ba tsohe ka moyo o kgohlahetseng, monyemo, kgang, mabifi a tllokamang. Hase Moya wa Modimo oo. Ho ntse ho tswelwa pele, ho tsuwe tseleng, tsamaiso ya Kereke ha e tsejwe hore keng, ha ba tsebe ho itshwara ka tlung ya Modimo, maitshwaro ha a yo, tjhe, tshabo ha e yo ho hang, ha ho—ha ho boikutlo nqa Modimo,

sohle seo ba se nahanang ke “kereke ya ka.” Ho a bontsha ba amohetse moyo wa kereke, mme e seng Moya wa Modimo; hoba O fothola dintho tsohle ho wena, ho e tjhesa. Ehlide.

Le a bona, ba re, “O kae?” Hoo, re na le tokelo ya ho etsa jwalo.

¹⁰⁶ Empa, shebang, ha maru a leketlile hodima letsatsi, letsatsi le ntse le tjhabile ka mehla. Ntho feela e le thibang ho o tjhabela, ke maru. Mme ha o ka suthisa maru, letsatsi le tla be le tjhabile. Amen.

¹⁰⁷ Moena, ho sutha sebeng sa rona sohle le dipelaelo, le dipherekano tsa rona, esale Mora a tjhaba ho qala ka Letsatsi la Pentekosta! Moya o Halalelang kajeno o moholo hakaalo ka moo O kileng wa ba kateng. Empa dihlopha tsa rona tsa bodumedi di pupeditse Lentswe la Modimo, ka ho re, “Le etseditswe tsatsi le leng. Oh, hoo ho tla, phodiso ya Kgalalelo, e tla etsahala Dilemong tse Sekete.” Kapa, “Phodiso ya Kgalalelo e ne e le morao *kwana*. Ha e amane le letsatsi lena.”

¹⁰⁸ E kaba Yena maobane, kajeno, le ka ho sa feleng jwang, mme phodiso ya Kgalalelo e nyametse? Ho ka tla jwang hore Matla, ho ka tla jwang... Bibile e beile ka mahlopho, “Pele ke baapostola, baporofeta, baruti, baboledi, badisa, e le dinepahatso tsa hobane Evangeli e sa phela.” Mme Modimo o ba romela hara rona hantle, mme re e nea seholoholo sa rona. Modimo ha o hlolehe, ke batho ba hlolehileng.

¹⁰⁹ “E kae mehlolo, hara rona he? E kae?” Modimo o ne a bua le monna enwa, ho mo lokisetsa ho tswela ntle.

¹¹⁰ Suthisa maru, ha esale letsatsi le tjhabile. Ke hantle. Ha dipelaelo di tlohile, mme dintho di lokisetswe, mehlolo e tla hlaha ruri jwaloka ha Mora a le teng.

¹¹¹ Letsatsi, ka taelo ya Modimo, le tjhaba letsatsi ka leng. Le mono ka hobane Modimo a le laetse mono. Mme ha feela motshehare le bosiu di le teng, letsatsi le tla lopalla mono. Ehlide. Ha o le bone ka dinako tsohle, hobane maru a le pupeditse; mohodi, maru, a tlase kapa a hodimo, a le kgurumetsa. Empa le teng mono ka mehla, le a bona.

¹¹² Mme ntho feela eo o batlang ho e etsa, ho bona mehlolo kajeno, ha o batla ho bona mohlolo wa Modimo, suthisa feela pelaelo yohle ya hao. Suthisa tumelwana ya hao yohle, suthisa sehlopha sohle sa hao sa bodumedi, mme Mora ke eo o tjhabile ka boitaolo.

¹¹³ Ke Molao wa Modimo, hoba O itse, “Esale Yena maobane, kajeno, le ka ho sa feleng.” Ka hona, ha feela A tlameha ho ba teng mono ka ho sa feleng, O teng! Ha hopotsa ka yona, O teng! E kae mehlolo? Mehlolo e sitiswa keng? Modimo o rometse Kreste, Kreste o phela ka mehla le mehla! “Moo ba babedi

kapa ba bararo ba kopaneng ka Lebitso la Ka, Ke tla ba hara bona.” Amen! “Bonang, Ke na le lona ka mehla yohle, ho isa bofelong ba lefatshe.” Ke eo moo A leng teng, tshepiso ya Hae!

¹¹⁴ Molato keng he? Re dumelletse maru a pelaelo, meharo, mabifi, boitshepo, dihlopha tsa bodumedi, le dintho tse ding, ho phunyeletsa ho rona, ho phunyeletsa le ho re tlosa Lentsweng, ho re, “tseo di ne di le nakong e nngwe,” ho latola Kreste, ho latola kolobetso ya e—ya Morena, ya Moya o Halalelang, ho latola kolobetso ya Bokreste ka Lebitso la Jesu Kreste, dintho tse ding, dintho tsa mefuta yohle, ditumelwana tsa rona di re arohantse le Bibebe. Empa ka hara . . .

¹¹⁵ Na ha ho makatse, mohlolo, hore pontsheng ya yona yohle, Moena Way, pontsheng ya dihlopha tsohle tsa bodumedi, pontsheng ya basomi bohle, Bibebe e itulets e tshwana? E kgonne jwang ho fenya sekgothola? Modimo o ikemiseditse ho ahlola motho e mong le e mong ka Bibebe. Mme Bibebe ke Lentswe, mme Lentswe ke Kreste. E mong le e mong, motho e mong le e mong o tilo ahlolwa ka Seo.

¹¹⁶ Suthisa maru, ebe ho etsahalang, letsatsi le teng mono hantle; ntho feela eo le tlamehang ho e etsa kajeno. O se re, “Oho Jesu, tloo o mphodise! Oho Jesu, mphe Moya o Halalelang!” Suthisa maru feela, O se a le teng mono! O tlide dilemong tse ka bang makgolo a leshome le metso e robong tse fetileng, mme O sa le teng mono. Mme O tla ba teng ka mehla! “Ke phela ka mehla, yena maobane, kajeno, le ka ho sa feleng.” Ke hantle!

¹¹⁷ Jwale, Gideone le batho bao mono, pele ba ka bona, kapa ho tloha le ka mohla, ho bona mehlolo ya Modimo, ha ba le maemo a lokelang ho kgahlanyetswa. Ho kgahlanyetsa, ho bona Matla a mehlolo, ba tlameha ho dumela. Ba boetse ba tlamehile ho dumela le ho ikokobeletsa Lentswe la moporofeta, ho bona mehlolo ya Modimo. Jwale, hopolang, pele ba ka bona mehlolo, ba tlameha ho ikokobeletsa seo moporofeta a se buileng.

¹¹⁸ Mme pele re ka bona mehlolo ya Modimo, re tlameha ho ikokobeletsa seo baporofeta ba se buang. Bibebe ke Moporofeta, ho rona. Ke hantle!

¹¹⁹ Ha monna, ho sa tsottelehe kamoo a ipitsang moporofeta wa Modimo, wa Baptise, Methodise, Pentekosta, seo a ka bang sona, seo a ipitsang sona, ha Lentswe lena le sa phele ka ho yena, hase moporofeta. E ka ba moporofeta, empa, wa bohata. Baporofeta ba mnene ba bua ka Lentswe lena la nnete, le ho bea Modimo ka nepo e le Modimo o tshwanang, Matla a le mang, Mantswe a le mang, ntho ka nngwe e a tshwana, Lentswe la nnete.

¹²⁰ Jwale, ba ne ba tlamehile ho dumela. Ba ne ba tlameha ho dumela Lentswe la baporofeta le ho ikokobeletsa Lona, pele ba ka bona mehlolo ya Modimo.

¹²¹ Mme kajeno, o ke ke wa phaqola hohle mona tlasa moeka wa bohata, ho bolela ho re “Jesu hase yena maobane, kajeno, le ka ho sa feleng; matsatsi a mehlolo a fetile; mme ha ho ntho e kang kolobetso ya Moya o Halalelang,” le ho lebella ho bona mehlolo ya Modimo. O tlameha ho ikokobeletsa Lona! Mme ha o ikokobeletsa Lona, Modimo o hlokomela tsohle.

¹²² Hola o ka pheula maru wohle, letsatsi le se le ntse le le teng mono. Le lopaletse mono feela. Letsatsi ha le tsamaye, re bolellwa jwalo. Letsatsi le ituletse nqalong e le nngwe.

¹²³ Mme Kreste o ituletse! Mme ke hantle. Re sutha ho Yena, empa O ituletse. Ke hantle. Ntho feela o tlamehang ho e etsa ke ho retoloha le ho tobana le Yena hang, mme o bona se etsahalang. Tobana le Kreste! E seng ho tobana le kereke, e seng ho tobana le tumelwana, e seng ho tobana le mabitso a tlotsiso; tobana le Kreste! Le a bona, e seng ho tobana le koleshe ya thupello; tobana le Lentswe! Kreste ke Lentswe. Ehlide, ke Lona. Ke yona hantle.

¹²⁴ Ikokobeletse Lentswe, ho rona. Ba ne ba tlameha ho ikokobela Lentswe. Mme, ho rona, re tlameha ho ikokobeletsa Lentswe.

¹²⁵ Ha le rata ho tseba seo, ke ngotse Lengolo fatshe mona, ho re, “Ekare ha le dula ho Nna, le Mantswe a Ka ka ho lona, kopang seo le se batlang.” Le a bona? E ne e le eng? Ekare ha Lentswe la Modimo le le ka ho rona, mme le dutse ka mono, Le mpa le bua ka Bolona. “Kopang seo le se batlang, mme le tla se newa.” Jwale, hoo ho fumanwa ho Johanne 15:7, ha le batla ho le tshwaya. Le a bona, Jesu o itse, “Ekare ha le dula ho Nna, Mantswe a Ka a dula ka ho lona.”

¹²⁶ E seng kajeno ntho *e nngwe*; hosane, tsatsi le hlahlamang, ntho e sele; le ho kweneha, le ka *mona*, le tlase *mona*, le tlase *mane*. Hoo ho bontsha o ne o se na letho, le ho qala feela.

¹²⁷ Oh, o re, “Ke buile ka dipuo.” Botle. Empa, wena, le jwale, ha o eso fumane letho. Le a bona? O re, “Ke hobetse Moyeng.” Ho lokile, empa le jwale ha ke tsebe mofuta wa moyo oo o hobetseng tlasa wona. Le a bona?

¹²⁸ Ha eba o le ntho e nngwe, tsatsi le leng; mme vekeng e tlang, nthong e nngwe e sele; mme nako e tlang sekobola-patsi se se nyenyane ha se fihla, se kobola patsi e lehahla, o se sala morao le ya latelang ka hodimo ka mona, ho hlehla-tshimong, ha o tsebe o setho sa eng, jwale Kreste ha a dula ka ho wena. Lentswe la Hae ha le yo ka mono. Hobane, Le tsitsitse, o ke ke wa kgelohela lefifing!

¹²⁹ Jwaloka ha ke rerile tsatsi le leng ka “Mohlolahadi,” mohla Joshua a emisang letsatsi. Becky morao mane, o itse, “Ntate, o na ke ke a emisa letsatsi,” ho re, “lefatshe le ne le tla ema. O emisitse lefatshe.”

¹³⁰ Ka re, “O emisitse letsatsi.” Modimo ha a etse diphoso ka hara Bibele ya Hae.

¹³¹ Ho re, “Ebe O ne a ka emisa letsatsi jwang, letsatsi ha le tsamaye le hona? Letsatsi le eme tsi.”

¹³² Ka re, “Empa hono, tswibila e ka ntle mono, hase seo A na a bua ka sona. Letsatsi lena le neng le tsamaya mme le akgela lesedi la lona bophareng ba lefatshe, ke lona letsatsi leo A le emisitseng.”

¹³³ Ha ke tsebe seo Modimo a se entseng, ho phetha hoo, empa O emisitse letsatsi. Letsatsi le ne le tsamaya le lebile nqa *ena*, letsatsi hodima lefatshe, kgadimolo ya letsatsi. Tswibila eo ka ntle mono, re ke ke ra e bona boholeng ba dimaele tse milione, kapa dimilione tsa dimaele. Empa kgadimolo ya letsatsi, e neng e haola bophareng ba lefatshe, e tloha ho motshehare ho ya ho bosiu, ke sona seo Joshua a se laetseng ho ema tsi; mme ya ema. *Mohlolahadi* ke ntho “e sa kgolweheng, empa e le nnete.” Ka baka leo, ha e kgolwehe, empa le jwalo ke nnete.

¹³⁴ Ho tla jwang hore Modimo a qotsé moetsadibe, ya kgohlahetseng, ya mabifi-bifi, radikgang, mme a mo fetole mohalaledi wa Modimo? Ho tla jwang ha A qotsa mosadi ya nyehlileng hona, hoo dintja di sa tlo mo sala morao seterateng, mme a mo fetole mohalaledi wa Modimo? Ha ke kgone ho le bolella. Empa O e entse! Ke mohlolahadi. Ehlide bo! Mesebetsi yohle ya Modimo e meholo ke mohlolahadi.

¹³⁵ “Ekare ha le dula ho Nna, le Lentswe la Ka ka ho lona, kopang seo le se batlang, mme le tla se etsetswa.” Mohal. Johanne 14 kapa Mohal. Johanne 15, ntshwareleng, Mohal. Johanne 15:7. Ke hantle.

¹³⁶ Morao ho Genese, nakwana feela. Nowe o ile a lokela ho kgahlana le maemo. Nowe o ne a loketse ho dumela Lentswe la Modimo, le ho nka kgato hodima Lona, pele a ka bona mohlolo wa Modimo. Ke hantle. Nowe, moporofeta e moholo wa Genese, a lokela ho dumela Lentswe la Modimo le ho nka kgato hodima Lona, pele a bona mohlolo wa Modimo. Pula eso ka e na, le a tseba, pula eso be teng le ka mohla.

¹³⁷ Mme le nahana hore ba reng ho rona? Hoo, mongwaha oo e ne e le mongwaha o fetang mongwaha oo re phelang ho wona jwale, ka mahlale. Re ke ke ra hlola re haha piramide hape, kapa sefinkse. Ha re na ditsela tsa ho noka setopo; re ke ke ra se thatafatsa jwalo. Re ke ke ra kenya mmala seaparong, ho qeta nako, se ka ba kgonne morao mono. Ha re na le dintho tseo. Mme ke seo mahlale a rona a sejwale a ke keng a se fumana. Empa ba ne ba ena yona!

¹³⁸ Ha re na—ha re na dijenjene tse kang tseo ba bileng le tsona. Piramide e kgolo Egepeta e tsepame bohareng ba lefatshe ka phethahalo e kana, ho sa tsotellehe moo letsatsi le

leng teng, ha ho moriti o theang mathokong a yona. Re be re ka sitwa ho haha mohaho o jwalo. Ha re tsebe mokgwa wa ho e etsa. Le jwalo re ke ke ra haha piramite. Mme hodimo mono, hodimo majweng ao a sehlooho le ka mono, a dutse hodimo mono bophahamo ba halofo ya folete ya motse, ho na le majwe a boima ba ditone tse dibilione, ditone tse makgolo, ke rialo, a leketlile hodimo mono. Matjhini ana wohle ao re nang le wona lefatsheng a ke ke a phahamisetsa hodimo mono.

¹³⁹ Ba mpolella hore ho ka qosa diteraka tse leshome le metso e tsheletseng tse batsi, ho palamisa moomo wa sefinkse hodima yona. Ba ne ba le nyolele jwang hodimo mono? E entswe jwang? E ne e le boramahlale ba masene!

¹⁴⁰ Mme le nahana ba itseng ho monna, lehlanya, eo ho thweng ke moporofeta, ya itseng, “Metsi a tla tsholoha dipakapakeng”?

¹⁴¹ Mme ke ba utlwa ba re, “Re nka disebediswa tsa rona, mme re thunya hodimo kwana dinaleding, mme ha ho le phophi ya metsi dipakeng tsa mona le mane. A ho kae?”

¹⁴² Nowe o ne a ka kgutla ka sena, “Modimo o mpoleletse, ‘Pula e tlilo na.’” Ho lekane. Ke phetho. Modimo o itse e tlilo etsahala, ka hona ke se tlang ho etsahala. Ke hantle. (Ke tshwanela ho potlaka; baena ba bang ba eme.) Tjhe... O itse, “Pula e tlilo na.”

“O tseba jwang?”

“Ke Lentswe la Morena. Ke HO RIALO MORENA.”

¹⁴³ “O tlilo etsang ka yona, Nowe, ho tsamaya feela le ho rera ka yona?”

“Tjhe, monghadi. Ke tlilo itokisetsa yona.” Le a bona?

“Oh, hoo e tla ba mohlolo! Matsatsi a mehlolo a fetile.”

“Tiisetra feela, o tla e bona ka mora nakwana.” E, monghadi.

¹⁴⁴ Mme yaba o etsang? A haha areka pele pula e na. O ne a etsang? A nka kgato hodima tshepiso. Amen. Ke ikutlwa ke tletse pentekosta hona jwale, ho ikutlwa ke tletse borapedi!

¹⁴⁵ E, nka Modimo Lentsweng la Hae, nka kgato hodima tshepiso, ho sa tsottelehe se etsahalang, ho ho Modimo ho etsa se seng sohle. Ako qale feela o phetle maru! “Lahlela morwalo o mong le o mong o o tshwasang habonolo ka thoko.” Lahlela dipelaelo tsa hao tsohle ka thoko, ditshabo tsa hao, dihlopha tsa hao tsa bodumedi, ditumelwana tsa hao, le ntho ka nngwe e kgahlano le Lentswe. Jesu Kreste ke yena maobane, kajeno, le ka ho sa feleng. Lahlela ditumelwana tsa lona ka thoko, lahlela dihlopha tsa hao tsa bodumedi ka thoko, lahlela dipelaelo tsa hao ka thoko, dipherekano tsohle hao ka thoko, le ho tswela pele feela. Ntho ya pele o a tseba, o tla—o tla tlosa leqhetso la ho qetela, mme O tla be a eme mono. O tla kopana le Yena.

¹⁴⁶ Nowe o itse, “Mohla ke qetileng ho haha areka, O tla tla. Pula e tla qalella ho na!”

“Mohla o qetang ho haha areka?”

¹⁴⁷ “Leha e ka ema dilemo tse mashome a mane, ke tla be ke dutse ka hara areka, ke e emetse. E a tla, hobane Modimo o boletse jwalo!”

¹⁴⁸ Le a bona, ntho ya pele, o ne a loketse ho itokisa. A tseba hobane Modimo e ne e le Modimo wa mehlolo, ka hona a ke ke a Mo belaela. Modimo o ne a buile le yena, mme o e tsebile.

¹⁴⁹ Ha Modimo a bua le wena, ho tswa Lentsweng la Hae, ka pelong ya hao o a e tseba. Mohla lefatshe lohle le tlohileng ho wena, mme dintho tsa lefatshe di shwele, o a e tseba. Mohla, ha o rata lefatshe kapa dintho tsa lefatshe, o sa ntse o tseba, ka pelong ya hao, ha o a loka. Ke nnete. Ka baka leo, mohla sohle se nyametseng, ha ho sa le letho le ka etswang haese ho kopana le Modimo. O tla be a eme mono. O sa ntse a le teng.

¹⁵⁰ Jwaloka ha letsatsi, s-u-n, le jwalo S-o-n e sa le yena maobane, kajeno, le ka ho sa feleng. S-u-n eo e a tjhaba, ke lona letsatsi leo le tjhabileng ho Genese, lona letsatsi le tjhabetseng Elia thabeng eo, lona letsatsi le ileng la tima ka letsatsi la thakgiso. Alleluia! Esale Iona. Mme yena Mora wa Modimo, esale yena maobane, kajeno, le ka ho sa feleng; ka Matla a tshwaang, lerato le tshwanang, matshwao a tshwanang.

¹⁵¹ Kajeno, seo e leng, letshwao la Mokreste ke lefe? “Oh, o kena kereke, o ngola lebitso la hae bukeng, o na le lengolo.” Hase pontsho eo Jesu a buileng ka yona.

¹⁵² O itse, “Mehlolo e tla tsamaya le ba dumelang ke yona ena. Ka Lebitso la Ka ba tla leleka batemona, ho bua ka dipuo tse ntjha. Ha ba tshwara dinoha, kapa ba nwa dintho tse kotsi, di ke ke tsa ba ntsha kotsi. Ha ba bea matsoho hodima bakudi, ba tla hlaphohelwa.”

¹⁵³ Ha ekaba Modimo a ena le rona, di kae dipontsho tsa Hae? Ehlide, kgutlelang Lentsweng la Hae, dipontsho di tla itshebetsa ka botsona hang ha re kgutlela Lentsweng.

¹⁵⁴ Nowe, pele a ka bona mehlolo ya Modimo, jwaloka Gideone ha a ne a batlile ho botsa potso, pele o ne a loketse ho nka kgato hodima Lentswe la Modimo. Gideone o ne a loketse ho nka kgato hodima Lentswe la Modimo.

¹⁵⁵ Motho mang le mang o lokela ho nka kgato hodima Lentswe la Modimo. Pele nka re Modimo o ne a le teng, ka na ka lokela ho nka kgato hodima tshepiso ya Hae, yaba O a Iponahatsa. Ha o batla phodiso, dumela ho Yena! Nka kgato hodima Lentswe la Hae, e tla etsahala.

¹⁵⁶ Moshe, pele a ka bona mehlolo ya Modimo le ka mohla, a lokela ho nka kgato hodima Lentswe la Modimo pele. A tseba

hobane o utlwile mmae a re o tswetswe tswalo e mohlolo, a ile a patwa mahlakeng. A mmolella hore Modimo o mmitsitse le ho mo kgetha.

¹⁵⁷ Mme a nahana, “Be, nna monna ya bohlajana wa sesole, nka tswa mona feela mme ka fenetha—fenetha Moegepeta enwa mme ka mo epela leroleng. Mme nka etsa sohle seo ke se batlang. Ke phetho se leng teng.” Empa, le a bona, ke seo a neng a leka ho se etsa. E ne e le mohopolo wa hae. A eso bone hore Modimo oo o etsang—ho etsa mohlolo ho mo mmaballa nakong eo.

¹⁵⁸ Empa ka tsatsi le leng, hoba a qete dilemo tse mashome a robedi, o ne a alositse manku, a theoha lekgulong, mohlomong tselaneng eo dinku di mathileng ho yona. Mme modisa wa leqheku a itsamaela mono, ka molangwana o kgopameng letsohong la hae, a hlohlotsa ka thoko ho tselana; a batla a holofetse, dilemong tse mashome a robedi; matshwala a leketlile ho fihla lethekeng, mohlomong, a pudufetse jwaloka nku a na e alositse. Mme a bona Ntho e nngwe! Oho Modimo! E ne e le semaka ho yena.

¹⁵⁹ Ke tshepa nka le bontsha ntho e nngwe bosiusing bona. Mme re na le letsha la metsi mona, le itokisitseng.

¹⁶⁰ A bona ntho a esong ho e bone pele. Mme a re, “Ke mpe ke E hlahllobise.” Ka hona a fapoha, mme Lentswe la Morena la tla ho yena. Ho bokwe! Alleluia! Lentswe la Morena la tla ho yena. Jwale, pele a ka tsamaya, a lokela ho nka kgato hodima Lentswe la Morena.

¹⁶¹ Mme, le hopole, Lentswe la Morena le etsa mehlolo ka mehla. A re, “Nka tseba kae hobane O na le nna, le ‘ho o roma?’”

Ho re, “O tshwereng letsohong la hao?”

A re, “Thutswana e omeletseng.”

¹⁶² “E lahlele fatshe!” Molao wa pele oo Modimo a o fang Moshe. “Ha o batla ho tseba hobane Ke Modimo; o tshwere thutswana letsohong la hao, e lahlele fatshe.”

Gideone o itse, “Mehlolo ya Modimo e kae?”

¹⁶³ O itse, “Bea bohobe boo hodima aletare, Ke tla o bontsha hore Modimo ke Mang.” Mme A se ama ka lere la Hae; mme mosi wa tswa wa lopalla, mme sa ttheswa.

¹⁶⁴ Moshe a re, “Ke tla re ke romilwe ke mang? Ke tla tseba kang hore O Modimo?”

¹⁶⁵ O itse, “O tshwereng letsohong la hao? Ke Mmopi wa bophelo. Ke Modimo o etsang mohlolo.” Mme pele Moshe a ka bona Matla a Modimo a sebeditseng dintho tsohle, pele o ne a tlamehile ho ikobela Modimo. A lahlela molangwana fatshe, wa fetoha noha. Shuu! Oh, kgidi! Eng? Ke... .

Kutlo e tlie pele, pele o bona mehlolo ya Hae!

¹⁶⁶ Dikereke tsena tseo ho thweng ke tsona dinaheng kajeno, ho thwe, “Be, e kae mehlolo yohle? Re tla fa motho ya ka dumellang sekete sa didolara, ya ka hlasisang mohlolo.” Wena, mofutsana, wa maiketsetso, mokwenehi, ya shweleng habedi, ya fothotsweng ka metso!

¹⁶⁷ O ka bona mohlolo jwang le ka mohla, pele o fetoha o mong? Ho bokwe! Mohlolo wa mohau wa Modimo, ho nka mosadumele ya belaelang le ho mo tlatsa ka Moya o Halalelang! Jesu o itse, “Motho ha a sa tswalwe labobedi, a ke ke a bona Mmuso wa Modimo.” Ha o batla ho bona mohlolo, fetoha o mong. E re Modimo a sebetse hodima hao, pele. Yena O tlameha ho hlanamisa ka tsela e itseng, ho kenya dilense tse fapaneng mahlong a hao, hobane o sefofu, ho shwa sebeng le ditlolong, ho foufala moyeng, ho shwa habedi. Hantle! Modimo o tlameha ho o fa Bophelo, ho ama mahlo a hao o tle o bone; ho etsa mohlolo, le ho o fetola mohlolo, mme o ka bona Modimo ya etsang mohlolo. Ke ntho ya pele.

¹⁶⁸ Moshe o ne a loketse ho Mo dumela. Moshe o ne a loketse ho nka kgato hodima Lona, ho nka kgato hodima seo Lentswe la Modimo le se buileng. A batla ho bona hore e ne e le Modimo kapa tjhe. O itse, “Be, Moshe, nka kgato hodima seo Ke o laelang sona.”

¹⁶⁹ Jwale mamela mona, bosius bona, moena, kgaitsemi. Ha o batla ho tseba hobane Modimo ke Mang, aka nke kgato hodima seo A se buang Mona. “Bakang, e mong le e mong wa lona, mme le kolobetswe ka Lebitso la Jesu Kreste, mme le tla fetoha mohlolo.” Ke tshepiso ya Hae eo. Ke seo A se buileng. Nka kgato hodima Lentswe la Hae, “Mme le tla nka neo ya Moya o Halalelang; hobane pallo ena e etseditswe lona le bana ba lona.” Oh, seo se etseditswe baapostola ba le bang? “Le ba leng hole, le bao Morena Modimo wa rona a tlang ho ba bitsa.” Pallo e lebisitswe mono.

¹⁷⁰ Nka kgato hodima Lentswe la Hae, mme o tla bona mohlolo wa makgonthe. Ntho e nngwe e tla etsahala ha o nka kgato hodima Lentswe la Hae. Jwaloka Gideone ha a entse, o entse seo A mo laetseng ho se etsa! Jwaloka Nowe ha a entse, o entse seo A mo laetseng ho se etsa! Jwaloka Moshe ha a entse, o entse seo A mo laetseng ho se etsa!

¹⁷¹ Ho re, “Lahlela molangwana wa hao fatshe!” Ka mantswa a mang, “Falatsa sohle seo o teetseng hare!” Amen. “Ntumelle Ke se tshware!”

¹⁷² Ho re, “Ka aparetswe ke mabifi a tlokomang.” A nee Modimo, O tseba mokgwa wa ho a kokobetsa. “Ke aparetswe ke ditakatso tse ngata.” Yena O tseba mokgwa ho di tlosa. Le a bona? Ako e bee matsohong a Hae feela, mme o shebelle seo mohlolo o ka se etsang. Ke hantle. Ho lokile.

¹⁷³ Moshe o ne a lokele ho sebetsa hodima Lentswe la Modimo, pele, kapa, ho mamela Lentswe la Modimo pele a ka bona mehlolo ya Modimo. Empa ka potlako hoba a o bone, moena, ha ho letho le tla mo thibela.

¹⁷⁴ Ke a mmona, tsatsi le hlahlamang, Sefora a dutse hodima mulete wona, le—le Gershome e monyenyanne a dutse nokeng ya hae, nokeng ya hae, ke rialo, matshwala a leketlile *jwalo*. Moena, sefahleho seo keha se bososela, mahlo ao keha a bapalla nqa sebakeng. Ho tloha ho moalosi wa manku, ho ya ho monna ya matla wa Modimo; monna wa senatla, a theoha ho ya lopolla. Shebang Gideone! Ho etsahetseng? E, monghadi, ho theoha ka molangwana o manyoka, ho hapa setjhaba. O e entse. Ehlide, o e entse. Modimo wa mo laela ho etsa.

¹⁷⁵ Ho sa tsottelehe ka moo e kang hase mnete, o mpa o etsa feela seo Modimo a o laelang ho se etsa. O tla fumana hobane Lentswe la Hae esale lona. Ako phetle maru feela, Mora o se a le teng a tjhabile.

¹⁷⁶ Joshua, oh, mohlodi e moholo eo! Oh, mohlahlami wa Moshe! Monna eo Modimo a mo ratileng, mohlabani e moholo! Monna eo Modimo a mo ratileng! Modimo o mmoleletse, “Jwaleka ha Ke ne ke ena le Moshe, Ke tla ba le wena.” Empa pele marako a wa, Joshua a hwanta ho ya ka ditaelo tsa Kapotene e Kgolo; ho pota lerako, makgetlo a leshome le metso e meraro, pele Matla a Modimo a ka kgahlola ntho eo. A hwanta a pota lerako, le ho letsas terompeta, ho ya ka Lentswe la Modimo leo Kapotene e Kgolo e mo laetseng lona ka ntle mono mohla A ne a kopana le yena. A hwanta ho ya ka Lentswe la Modimo. A etsang? A nka kgato hodima Lentswe, pele a ka bona mohlolo.

¹⁷⁷ Le a tseba, ho letsas terompeta feela ha ho heletse lerako leo o ka mathisang makoloi a ntwa hodima lona; ho letsas terompeta. Empa Modimo o itse, “Feela, feela ako hwante o pote marako, hasupa, mme, letsatsing la ho qetela, hwanta hasupa.” Mme ke ha leshome le metso e meraro. “Mme e tla re o sa potoloha lerako, kgetlong la ho qetela, o dumelle baprista ho etella pele, ka areka, le ho letsas terompeta. Mme e tla re ha terompeta e lla, marako a tla reketla a helehe.” Ba etsang? A bona mohlolo wa Modimo, hoba a nke kgato hodima Lentswe la Modimo.

Mehlolo ya hao e kae? Nka kgato hodima Lentswe la Hae, pele.

¹⁷⁸ Marako a be a ka reketla jwang a heleha, mme a siye ntlyonyana e le nngwe e eme, yona ntlo ya seotswa? Ka hobane a nkile kgato hodima Lentswe la Modimo. Hobaneng ba bang ba bona ba shwele, mme yena a phele? A nka kgato hodima Lentswe la Modimo, mme a bona mohlolo wa Modimo. Ke wona mokgwa wa ho e fumana, ho nka kgato hodima Lentswe.

¹⁷⁹ Bana ba Baheberu, seboping sa mollo. Ba entseng pele ba ka bona mohlolo wa Modimo? Ba nkile kgato hodima Lentswe la Modimo. Ba tsebile hobane E ne e le Modimo. Ba tseba hobane E ne e le Modimo o ba nyolotseng Egepeta. Ba—ba tsebile ka hobane ba ne ba . . . E ne e le wona Modimo o kileng wa ba teng, hore E ne eka kgona e be Modimo o etsang mohlolo.

¹⁸⁰ Mme O ba file thomo “ho se kgumamele medimo ya seseto.” Ha A fetohe. “Dula le Lentswe la Ka! O se ke wa kgumamela medimo ya seseto!”

¹⁸¹ Ba itseng? “Modimo wa rona o kgona ruri ho re lwela seboping sena sa mollo. Empa, le jwalo, re tla nka kgato hodima Lentswe la Hae!” Ke eo he. Ha etsahalang? Ba bone mohlolo wa Modimo, ka hore Modimo a ka thethefatsa mollo.

¹⁸² O a kula na? Nka kgato hodima Lentswe la Hae, ho bona ha ekaba A fodisa na. Ha o le moetsadibe, mme o batla ho tlatswa ka Moya o Halalelang; tloo, baka, mme o kolobetswe ka Lebitso la Jesu Kreste. Mme o nke kgato hodima Lentswe la Hae, bona se etsahalang. Ha o sa na le lefatshe ka ho wena; mme lona basadi le sa kuta moriri sekutwana, le sa ntse le tlola meikapo; wena monna o sa le mabifi, le ho pheha kgang ka dihlopha tsa lona tsa bodumedi; ha o batla ho fumana ha ekaba E sa le Modimo na; nka kgato hodima Lona, mme o namalle hodima aletare ya Hae, bona se etsahalang. Ke Modimo. O tlamehile ho nka kgato hodima Lentswe la Hae, pele.

¹⁸³ Daniele, pele a bona mohlolo wa Modimo, ho lwelwa lemeneng la ditanu, ntho ya pele a e entseng e le ho nka kgato hodima Lentswe la Modimo.

¹⁸⁴ Phatlalatso e ne e tswile, “Ekare motho ha a rapela modimo o sele ho seseto sena, ka matsatsi a *makana*, o tla lahlelwa lemeneng la ditanu.” Ho se motho ya ka rapelang modimo o sele ntle le ho Kgosi; o ne a tlameha ho ba modimo, le a bona, ka matsatsi a mashome a mararo.

¹⁸⁵ Empa Daniele o entseng? A nka kgato hodima Lentswe la Modimo. Hobane, mohla Salomone a ne a kgakola tempele, o ne a rapele, a re, “Morena, ekare ha setjhaba sa Hao se le mathateng, e ka bang kae, mme se sheba nqa tempele ena e halalelang, O ke o ba utlwé o le Lehodimong.” Ke hantle.

¹⁸⁶ Daniele o nkile kgato, pele. Thorelo e ne e le yona ena, “O tlilo nokelwa lemeneng la ditanu.” Empa Daniele a nka kgato hodima Lentswe la Modimo. A tseba hobane Modimo esale Modimo. Jwaloka Gideone ha a entse; o tsebile hobane Modimo, haeba esale Modimo, ebe mehlolo ya Hae e kae? Mme Daniele a tseba hobane e ne e le moporofeta, a tseba hobane o ne a rata Modimo. A tseba hobane e ne e le mohlanka wa Hae, a tseba hobane Modimo o ne a kgona ho mo lwela ditaung. Empa ha eba a le mathateng, tlasa thorelo, a reteletsa sefahleho sa hae nqa tempele, mme a rapela hararo ka letsatsi, hantle feels. A nka

kgato hodima Lentswe la Modimo, mme Modimo wa mo tlatsa ka Moya o Halalelang hoo ditau di sitlweng ho mo ja. Ke hantle. Ke hantle. Pele o ile a nka kgato hodima Lentswe la Modimo.

¹⁸⁷ Jonase, ka mpeng ya hlapi, pele o ile a nka kgato Lentsweng la Modimo. O tsebile hobane ho fedile ka yena, ho latela nama. Matsoho a hae a tlamilwe, maoto a hae a tlamilwe. Moreri enwa wa Baditjhaba a lahlelwa ka ntle ho sekepe, ka hara mpa ya hlapi, le tlase botebong ba lewatle. Jwale o maemong a makakang! Empa pele a iphikolosa, botebong ba hlapi, dimela tsa lewatle di mo thathetse molala. Etswe, e—e hlapi e ne e jele dimela tsena le dintho, ho kenya divithamine mmeleng wa yona, dipilisi tsa yona tsa divithamini, mme yaba e kenya moreri ka mono. Empa moreri enwa a iphumana a phaphama! Alleluia!

¹⁸⁸ Oh, moena, moreri, ako phaphame bosius bona! Sutha ditumelwaneng tseo tsa kgale le dinthong, mme o kgutlele ho Modimo o phelang, Lentsweng le phelang.

¹⁸⁹ A iphumana a phaphama, a phethoha. O ke ke wa pata mohalaledi thapelang ya hae. A phethoha, mme a sheba, hohle e ne e le mpa ya hlapi, ka nqa tsohle ho yena; botjhabela, leboya, bophirima, le borwa. Mme a ellewa hobane o ka mpeng ya hlapi, le tlase botebong ba lewatle, mme sefefo se puka hodima lewatle. Ditshepo tsohle di ne di nyametse a sa le hodima sekepe; mme jwale o ka mpeng ya hlapi, hole le tshepo ho feta pele le ka mohla. Mme eitse ha a bona e le mpa ya hlapi feela, a re, “Ke mafeela a thetsang. Nke ke ka hlola ke a dumela. Empa ke tla tadima nqa tempele ya Hao e halalelang, Morena.” Tempele e halalelang, e ne e sa sheba fatshe; o ile a re, “E teng hodimo *mane*, ha ho le jwalo ke shebile nqa yona.”

¹⁹⁰ Mme yaba o bona mohlolo wa Modimo. Ka mokgwa wa horeng, oksejene ya kena ka hara hlapi. A ka a phefumoloha ka tlwaelo matsatsi a mararo, mme a roba monakedi nakwana a palama, a tle a qete matsatsi ana a mashome a mane . . . leetong le haolang, motseng o mofebi tlase mane, ho rera Evangedi. A ka a hahlamelwa ke hlasimoloho e ntjha ya oksejene e tswang Lehodimong. E ke ke ya tswa hlaping, mme e ke ke ya tswa lewatleng, ka hona e ne e loketse ho tswa ho Modimo!

¹⁹¹ Oh, ako budulele hodima rona bosius bona, Morena, Oksejene eo ya Lentswe la Modimo, Matleng a tsoho ya Hae, re tle re dule re phetse tsatsing lena la ho bofelo, le mofebi. Ako budulele hodima rona, Oho Moya o Halalelang! Ke yona, moena. Ako budulele, Morena, re tlatse ka Oksejene!

¹⁹² Jwaloka ha ke le boleletse ka letata hoseng hona. Hang feela ha le ne le fofonela metsi, ha se ke ha ba letho ho le thibela wona; ho kakatletsa hohle ha sethole, le ntho e nngwe le e nngwe. Le ile la toba metsi hantle, hobane e ne e le letata.

¹⁹³ Jwale, ha ekaba e mong wa lona a ena le semelo sa letata, re na le letshahadi motsheo mona, le a bona. Ha o kgona ho

fofonela, ha o ena le bohashana ba hore Modimo esale Modimo, ha o ena le bohashana bo tswang Lehodimong bosiung bona, hore Modimo o boloka Lentswe la Hae mme ke Modimo o etsang mohlolo, mme o eso amohele Moya o Halalelang le jwale; fofonela metsi, ntho ya pele A boletseng hore e etswe. Ruri. Baka, ho tswa botebong ba pelo ya hao, mme o namalle jwaloka sehlabeledo hodima aletare; mme o tla timeletswa, lefatshe, le ho tswalwa labobedi ke Moya; le ho kolobetswa ka Lebitso la Jesu Kreste, O tla o tlatsa ka Moya o Halalelang. Ako haole hara mosebetsi o tshwanelehang, e seng ho tla tsukutla matsoho le moreri le ho ngola lebitso la hao bukeng, empa, ho shwa hoo o sa hholeng o tseba lefatshe.

¹⁹⁴ Abele o shweletse aletareng e le nngwe le konyana ya hae. Mme mokgwa o le mong o tla loka ho Modimo, ke ho shwela aletareng le Kreste, ho fihlela ntho ka nngwe e ntshofala ka mathoko ho wena. Ho shwela mono! Mme ha o boela o tsoha, o tla ba mmopuwa e motjha ka ho Kreste. Ehlide.

¹⁹⁵ Jonase o ne a loketse ho dumela Lentswe la Modimo, le ho nka kgato hodima Lona, pele. Jwale, mohlomong a robetse sefahleho sa hae se kodumetse, ha a ne a kena mpeng ya hlapi, hoba ba ile ba mo kodumetsa feela; a tsorama feela ka mpeng ya hlapi. Hlapi ya re, “Be, re tla theohela botebong ba lewatle jwale.”

¹⁹⁶ Mme ke ipotsa seo hlapi eo e se nahanneng matsatsi a mararo ao, ho etsahala ntho e makatsang. Jwale, le a bona, mohaho, wa hlapi, o ne o sa e ananele. Le jwalo kereke ya bodumedi ba mokgatlo ha e ananele. Empa, oh, ka moo Jonase a neng a e rata! Ehlide, o entse. Ehlide, o e ratile, hoba e ne e le pudulo e ntjha eo Modimo a na mo foka ka yona, mme o ne a dula a phela. Modimo, foka hodima rona ka Pudulo e ntjha!

¹⁹⁷ Efela ha Jonase a kgonne ho etsa mohlolo o jwalo, ka ho dumela Lentswe la Modimo, ka tempele ya tlahlo; athe, monna eo ho feleng obile a wa, Solomone, a e hahileng, empa a kopa Modimo, thapeleng, ho hlohonolofatsa mang le mang ya tadinang tempele eo, le ho ba lwela mathateng a bona, hohle moo ba leng teng; mme Jonase o kgonne ho dumela, tlasa maemo ao. Re ka dumela ha kakang, bosiung bona, ho sheba nqa Lehodimo; moo, e seng mongala, e seng monna ya shweleng mme a ituletsle lebitleng, jwaloka Jonase...kapa jwaloka Salomone mohlang oo; empa Modimo o phelang O dutseng letsohong le letona la Boholo, Matla wohle le borena, le theroy a Lentswe le ho romela Moya o Halalelang e le paki ya hobane O entse. Amen. Dumela Lentswe la Modimo, o tla bona mehlolo ya Modimo. Empa o tlameha ho Le dumela, pele. Ehlide ho bile jwalo. Ee.

¹⁹⁸ Gideone, hoba a bone Moeti enwa a dutse tlasa sefate, mme Gideone a ka a Mmotsa, pele. A re, “Ha ekaba Modimo esale Modimo, ha ekaba Modimo a ena le rona, e kae mehlolo ya Hae?” Mme enwa—mme Moeti enwa ya dutseng tlasa sefate, A

etsang? Eitse ha A ama sehlabelo seo ka molangwana wa Hae A o tshwereng letsohong la Hae, sa tjha. Mme a tseba hoba ke motsamao wa Modimo oo, ka hona a tseba hobane Moeti ya tlasa sefate, ya kang Monna moholo ya dutseng mono, e ne e le Lentswe le entsweng nama. Alleluia! E ne e le Lentswe le phelang. A tseba hore leo e ne e le Lentswe le phelang, hobane Le ne le hata mme le phela lekgatheng-la-jwale. Ho bokwe Modimo, moena!

¹⁹⁹ Pentekosta e itoketse, empa ke mollo o takilweng ha o sa ka wa E amohela ka bowena. Hase lekgathe-le-fitile; lekgathe-le-jwale! Modimo wa histori o thusang ha A sa tshwane le Modimo eo kajeno? Jwaleka ha ke boletse kgafetsa, ho thusang ho fa kanari ya hao, nonyana, divithamine ho hodisa mapheyo a yona, le ho e hlahlela letsabeng le ho e dudisa mono? Ho thusang ho ruta ka Modimo wa Matla ya leng teng, mme o ntoo tima batho monyetla wa ho Mo sebeletsa? Amen. Ruri. Bosawana!

²⁰⁰ Hobaneng le na le dikoleshe tsena tsa thupello ka mathoko, tse kang seqhotsisi sa setonana, ho qhotsa bareri? Le a bona?

²⁰¹ Esale ke utlwela tsuonyana ya seqhotsisi bohloko, ho bua nnete ha e a ba le mme. Ha e a ka ya tseba moo e hlahileng teng. E hlokile mme, e tlide ka tshebetso ya motjhini.

²⁰² Ho batla ho le jwalo ka moreri wa koleshe ya thupelo ya itsebelang thutamodimo feela. A ka ba masene mme a bentshwa se ka moithuti ofe feela, a ka rera ka dipuo tse ngata tse fapaneng, empa ha a sa tsebe hore Motswadi wa hae ke mang!

²⁰³ Jwaloka ha ke boletse nakwana e fetileng; ha eba ntho e le teng e hlokang temoho, ke moulu. Ha e tsebe ntata yona kapa mma yona ke mang. Ke lefutswelwa la ntho, le a bona, ha e tsebe hore ke mang, ntate ke mang, mme. Ha e tsebe moo e welang teng. Le Bakreste bana ba mafutswelwa ba jwalo, bao ho thweng ke bona, ba otletsweng dihlopheng tsa bodumedi. Empa pere ya makgonthe ya madi ke ya lesika, e tseba sohle ka yona.

²⁰⁴ Mme Mokreste wa makoma wa madi o tseba moo Modiko wa Modimo o leng teng. Ba tseba hobane ba tswetswe ke Lentswe. Lentswe le entswe nama ka ho bona. Lentswe ka leng leo Modimo a le buang, ha ba Le hanyetse; ba re, “Le nepile! Amen, hape amen!” Ba Le omela ka “amen,” nako le nako. “Amen! Amen!” Ntho e nngwe ka ho bona e a Le omela, ka bo-Yena.

“Jesu Kreste e ne e le yena maobane, kajeno, le ka ho sa feleng.”

“Amen!”

“Ya dumelang ho Nna, mesebetsi eo Ke e etsang o tla e etsa le yena.”

“Amen!”

²⁰⁵ “Eyang ka lefatshe lohle, le boelle mmopuwa e mong le e mong Evangeli. Ya dumelang mme a kolobetswa, o tla bolokeha. Mme dipontsho tse tla tsamaya le ba dumelang ke tsona tsena.”

“Amen!”

²⁰⁶ Sethole sa kgale se itse, “Cluck-cluck-cluck, homme matsatsi a mehlolo a fetile.”

Empa, “Honk-honk-honk, ke fofonela metsi!”

²⁰⁷ Le a bona, ke yona. Ke hantle. Le a bona? Hobaneng? O bea Modimo tekong. Le a bona, ke yona, Modimo pele. Nka kgato hodima Lentswe la Hae, mme o bone ha ekaba Le lokile. Ke nnete.

²⁰⁸ Johanne Mokolobetsi o ne a le tshebetsonya ya hae ya kutlo. E ne e re esale e—e moshanyana feela, ha re na rekoto e kaalo.

²⁰⁹ Ntatae e ne e le monna ya lokileng, empa a sitwa ho dumela Modimo. Modimo o ne a tla, a ikemisditse, ho le tlisa ka Elisabetha, lesea lena. Ka baka leo A mmolella, a bolella yena hore o...O tla emola ngwana enwa. Mme o e belaetse, mme A mo otla ka bomumu.

Ke a kgolwa pelo ya batswadi ba Johanne Mokolobetsi, Elisabetha le Sakaria, e ne e batla e hloname, ka ho tseba hobane ba tsofetse. Mme ngwana enwa wa tshepiso ya tswetsweng, kaha Modimo a entse mohlolo mme a hlahisitse ngwana enwa lefatsheng, mohla ba seng ba tsofetse ba tlotse dilemo. Ba tsebile hore dipelo tsa bona di ne di hloname, kaha ba ke ke ba phela halelele ho mmona a phetha mosebetsi wa hae o moholo wa Modimo. Empa ba mo kgakolela wona! Ho bokwe Modimo! Kae-kae mose ho dinaledi le kgwedi, ba ka nyarela fatshe le ho e bona. Ba sa tlo bona moshanyana enwa...Ba ile ba shwa. Ba shwele e sa le ngwana, mothaka feela. Moshanyana, a siya lapa labo mme a kena lefeelleng. Teng a hodisetswa, tlasa Matla a Modimo.

²¹⁰ Modimo o mmoleletse, “Wena o lentswe la ya howang feelleng. Ke a o roma. Eya, o hlabe mokgosi!”

²¹¹ Ka moo Johanne a ileng a lokela ho ema letsatsi ka leng, a ntse a qobokisa dinoha mafikeng, mme a raha majwe. “Oh, ha ke kgone ho ema!”

“O emetseng, Johanne?”

²¹² “Feeela, ke batla ho utlwa thomo ya Hae, ke phetho.” “Suthang tseleng, dinoha!” Di nto balehela mafikeng. Ke ka hona, Bafarasi bao ba tswileng, a itseng, “Oh, lona madinyane a marabe, balehelang mafikeng!”

²¹³ Ke rialo bosiusa bona. Lona madinyane a marabe, balehelang metsing! Amen. Le tseba seo ke buang ka sona. Diteipi tsena, di a hatiswa, di ya lefatsheng lohle. Balehelang metsing, ha ekaba le batla ho bona mehlolo ya Modimo!

²¹⁴ Johanne a latetse hantle feela. Ha nyoloha mothaka e motjha ya lokileng; a re, “E ka ba Yena.” A sheba. “Tjhe, hase Yena. Tjhe. Modimo o mphile tshepiso.”

“Johanne, o re Messia o a phela kajeno?”

“E.”

“O kae?”

²¹⁵ “Mona lefatsheng, kae-kae. Ha ke tsebe moo A leng teng, empa ke tla Mo tseba ha A fihla.”

“O tseba jwang?”

“Modimo o mpoleletse hore ke shebeng.”

²¹⁶ “O tseba kang hore o tla fola ha o rapellwa?” Modimo o mpoleletse hore ke shebeng. “O tseba kang hore o tla amohela Moya o Halalelang?” Ke sala Lentswe la Hae morao. O mpoleletse hore ke shebeng, ke tseba se tla latela, le a bona. Na o tseba se tla latela? Ha o ka mamela Lentswe la Modimo, tshepiso ya Hae ke yona e latelang. A ke ke a bua leshano; Ke Modimo.

“Ho latelang ke hofe?”

Johanne a re, “Ke tla Mmona ha A fihla.”

²¹⁷ Ba itse, “Oh, shebang thaka lena le tlango mona. Eo, o rwetse moqhaka hloohong ya hae, e tshwanetse e be e le Messia, ya qhobang dipere tseo.”

Ho re, “Hase Yena eo.”

²¹⁸ Ho mo atamela haufi, ho re, “Hase tshwanelo ho wena ho nka mosadi wa monyane wa hao!” Ba tsebile hore phoso e teng mono. Ho mo atamela, le ho mo mmolella. E ne e le Heroda eo, le a bona. Mme, oh, ya hla ya hlahaftsa mosadi wa hae, a mo hloya ha feela antse a phela. Le a bona?

²¹⁹ Johanne a nna a sheba. A re, “Oh, ke tla Mo tseba ha A fihla.”

“O tseba jwang?”

²²⁰ “Modimo o itse ke tla bona pontsho, mme e tla be e le pontsho ya bo-Messia. Ke tla tseba Messia hobane pontsho ya Messia e tla be e le teng mono.”

²²¹ Modimo o tseba Kereke ya Hae. O itse, “Mehlolo ena e tla tsamaya le bona.” E seng “e tla ba maloko a Mamethodise, Mabaptise, kapa Mapentekosta.” Empa, “Mehlolo ena e tla tsamaya le ba dumelang.” O tseba badumedi.

Ka nako tse ding o re, kajeno, “O modumedi na?”

²²² “Oh, ke Methodise.” Be, hoo o supa o se modumedi he, le a bona. “Ke Mopentekosta.” Hoo ho sa ntse ho o supa o se modumedi.

²²³ Ha o le modumedi, o dumela Modimo! Mang le mang o a e tseba, o tshwailwe ke Mmuso wa Modimo; mme tiiso e mahlakoreng a mabedi a leqephe, ho tla le ho tsamaya. Le a bona, o ka ba supa. Ke hantle.

²²⁴ O itse, “Ke tla Mo tseba ha A fihla, hoba pontsho e tla ba teng. Ke tla bona pontsho ya bo-Messia.” Tsatsi le leng a tadima . . .

²²⁵ Oh, moena! Hobaneng? O ne a E lebeletse, ke kamoo a E lemohileng kateng. [Moena Branham o kokota sefaleng—Mong.] Ke tshepa e thophothela. Na le E lebeletse? Ana le shebeletse ntho e nngwe ho etsahala? Ha ho le jwalo tsebang Mangolo!

²²⁶ Jwale, baprista bao bohole ba emeng mono, keha ba feta Johanne ha hlano ka bohlale. Ha re na tlaleho ya sekolo seo a se tsamaileng, letsatsi le le leng. Empa mono keha ho eme baprista, bao bontata-ntata-ntata-ntata bona moholo e be e le baprista. Mono keha ho eme monna ya tsebileng noko ka nngwe ya lengolo leo le thathetsweng, le baporofeta bohole le Genese, le tsohle tse amanang le yona. Empa, le a bona, Johanne o ne a lebeletse pontsho, Messia! O tsebile hobane ha eba e ne e le Modimo, ho tla ba le ho ka hodima hloleho ka yona. Ke hantle.

²²⁷ Ho a tshwana le kajeno! Ha o le Mokreste, ho na le ntho e ka hodima hloleho e o kgahlotseng. Ha eba e sa kgahlola, o thetsitswe. O sa phela bophelo o bo phetseng pele, o sa rata tsona dintho tseo o di ratileng pele, o sa di rata, o thetsitswe; ke hantle, hase mora kapa moradi wa Modimo.

²²⁸ Ebe moo re fumanang, Johanne o ne a eme mono tsatsi leng, mme ba re e...ha ke bala e—e—e palenyana ya Hae, ho thwe Johanne o na le mose wane, ba mo leleketsi lehlakoreng le leng. Mohlanka wa Modimo ba mo tshwara jwalo, ho mo leleka dihlopheng ka ding tsa bodumedi, mokgatlong ka mong, ntho e nngwe le e nngwe e sele. A se na sefala ho ema ho sona; empa a le hara seretse, ho fihla mangoleng a hae. A sa apara sutu ya tuxedo, mme lepetu la hempe ya hae le hetlile morao, le hona. Tjhe, monghadi. A itlamile ka sekotwana sa letlalo la nku, eka monna ya hlaha ya emeng ka ntle mono.

²²⁹ Mme baprista bao ba itse, “O re ho nna nako ya tla eo tempele e kgolo ena, mokgatlo wa rona o moholo, o tla heleha?”

A re, “Ehlile bo, e tla etsa.”

“O e tseba jwang?”

²³⁰ “Athe Lengolo le le bala jwang? Messia o a tla, mme Messia eo o tla fedisa sehlabelo sa ka mehla. Daniele o itsalo! Moporofeta o itsalo!” Alleluia!

Oh, ke ikutlwa ke eketsa ho halalela nako le nako! (Ke tlameha ho emisa.)

“O e tseba jwang? Moporofeta o itsalo!

²³¹ Ke ka moo Mikea a tsebileng hore a ke ke a hlohonolofatsa Akabe; Elia o sa na mo rohake. Ke phetho. A loketse ho dula Lentsweng. O batla ho bona mesebetsi ya Modimo, o tlameha ho latela Lentswe la Modimo. O tsebile e ke ke ya etsahala.

²³² Yaba ho etsahalang he? O ne a batlile ho bona mesebetsi ya Modimo. Johanne a re, “Ke tla Mo tseba ha A fihla.”

²³³ Tsatsi le leng keha aeme mono, a re, “E, ho tla fihla mohla sehlabelo sa ka mehla se tla fediswa. Messia e tla ba Sehlabelo sa ka mehla. Mme manyala a bofediso a tla kena.”

“Rabbi, taba eo o e fumana kae? Seo se kgahlano le tumelwana ya rona.”

²³⁴ Empa ha Se kgahlano le Lentswe la Modimo. Moporofeta ke eo, hobane Lentswe la Morena le ne le dutse ho moporofeta eo. Ke hantle.

²³⁵ Mme a bua a re, “Bonang, ke eo moo e emeng Konyana ya Modimo, e tlosang sebe sa lefatshe!” La tlwaelo, le le nyenyane, Thaka le mahetla a kobameng le emeng mono, la tla le theohela nqa noka, le tsamaya le Lazaro. Monna wa tlwaelo feela, a apere se ka banna ba tlwaelo; e se moprista, ho se katiba ya turbane, ha ho moqhaka, ha ho letho; haese Moshanyana wa mofutsana, wa Mmetli, ho tla a theoha, matshoho a Hae a tletse diphatsa, mohlomong; ho tla a theoha.

“O mpolella ho re . . .”

²³⁶ “Eng? Ha le Mmone mono na? Bonang!” Ke ho re, “Tadimang ho, lekanyang! Ke eo Konyana ya Modimo, e tlosang sebe sa lefatshe.”

²³⁷ Bang ba bona ba re, “Be, le a tseba Eo ke mang? Ke mora mmetli. Jwale, thaka leo re a mo tseba hase moporofeta.” Empa, E ne e le yena. E ne e le yena. O tsebile. “Hobaneng? Ha a tsebe seo a buang ka sona?” E, o tsebile. “O kgonne jwang ho Mo qoholla a fapane le monna ofe kapa ofe?” Messia o tla be a fapane. “Re tla e tseba jwang?” Johanne o bone seo ba sa kang ba se bona.

²³⁸ E itshetlehile ho seo o se shebileng. O bonang bosiusing bona? Na o bona monna e moholo, ya summeng, seholpha se seholo sa bodumedi, mme ntho e nngwe le e nngwe e wela matsohong a hao? Kapa, o mpa o kgetha tsela ya bakgeswa ba mmalwa ba Morena? Na o bona Bibele? Na o bona Lentswe la Modimo? Ha o tswetswe la bobedi, o tla Le bona. Pele o etsa, o ke ke wa Le bona.

²³⁹ Ke enwa A e tla. A re, “Ya mpoleletseng, lefeelleng!” Oh, moena! “Ya mpoleletseng ho ‘howa’! Esale ke howa mona dikgwedi tse tsheletseng, ho ya fihla kwana mantsiboya, hohle mona, hodimo-le-tlase ho Jordane ena, ke qhafutsa seretseng sena; ho ngangisana le lona bareri, bareri, ho rahaka dihlophya tsa lona tsa borapedi, ke hata menwana ya lona e bohloko. Empa Ntho eo e teng mona, ke a E bona!”

“O tseba jwang?”

²⁴⁰ “Yena Ya mpoleletseng ho ‘ba lentswe le howang feelleng,’ Modimo o ntlhahisitse ka morero oo, ho re, ‘hodima Eo’ ke ‘tla bona Moya.’”

²⁴¹ Johanne o Mo tsebile. A etsang? A rera Lentswe pele, a utlwa Lentswe, mme a bona pontsho ya Modimo. Mme, le

hopole, ha ho a ngolwa mang feela wa ba emeng mono a E bone. Johanne o E bone, a le mong. E itshetlehile hodima seo o se batlang. Hobaneng? Johanne o ne a ikokobeletsa Lentswe. Baprista le bao ba sa ikokobeletse Lentswe. Johanne o ne a ikokobeletsa Lentswe, thomo ya hae, mme o E bone. (Re tla potlaka haholo; re loketse jwalo.)

²⁴² Marethia, lebitleng. O ne a kopane le Lentswe la Modimo. A Le dumetse. Pele a ka bona mohlolo wa Modimo, a tlameha ho dumela Lentswe la Modimo le ho nka kgato hodima Lona. O itse, "Morena, hola wa ba teng mona, ngwaneso a ka be a sa shwa."

²⁴³ A re, "Marethia, Ke nna tsoho le Bophelo. Ya dumelang ho Nna, leha a shwele, empa o tla phela. Mme ya phelang mme a dumela ho Nna, a ke ke a shwa. O dumela see?"

A re, "E, Morena." Ke moo, ho nka kgato! "Ke a dumela."

"O dumela eng, Marethia?"

"Hore O Kreste ya neng a tla tla lefatsheng."

Ho re, "Le mmeile kae?"

²⁴⁴ Ba fihla lebitleng mono, mme keha Aeme mono. (Ho re, "Ke batla ho bona ha ekaba a hlile a dumela hore Ke Lentswe na.") Ho re, "Phikolosa lejwe."

²⁴⁵ A tloha a nka kgato hodima Lentswe! O ne a tlamehile jwalo, ho bona ha lefu le fetolwa bophelo.

²⁴⁶ Mme mokgwa o le mong o tla bona lefu le fetolwa bophelo, ke ho nka Lentswe la Hae le ho nka kgato hodima Lona!

²⁴⁷ Ha o le moetsadibe, nka Lentswe la Hae mme o nke kgato hodima Lona, ke moo o tla bona mohlolo wa Modimo. Wena o fetoha mohlolo wa Modimo.

²⁴⁸ Ha o kula, nka Lentswe la Modimo! Ngaka e re, "O tlilo shwa." Nka Lentswe la Modimo mme o nke kgato hodima Lona, hoo ho tla hlahisa bophelo bo botjha. Oh, kgidi!

²⁴⁹ Ke mohau ho le diehisa hakana. Ho hongnyana hape, ke nto kwala. Le a bona, ho hongnyana hape. Ka botshepehi, ke tla e etsa. Ke mohau ho nka nako ya banabeso. Le a bona, ho ba siela dihora tse pedi feela tsa yona. Shebang.

²⁵⁰ Mosadi sedibeng. E ne e le moetsadibe. A ena le banna ba bahlano. A tswela mono tsatsi le leng, ho kga metsi. A qala a kga metsi, mme a utlwa Monna a re, "Mosadi, Mphe metsi."

²⁵¹ A qamaka, mme a re, "Hase tshwanelo ho Bajuda ho bua le Basamaria. Nna ke mosadi wa Samaria. Mme hase tshwanelo. Horeng O ka buisana le nna?"

²⁵² A re, "Empa holane o tsebile Eo o buang le yena, o ka be o kopile metsi ho Nna."

²⁵³ "Hobaneng," a re, "sediba se tebile, mme ha O na sekgelelo." Ho re, "Jwang, jwang—jwang O tlilo fumana metsi jwang?"

²⁵⁴ Mme A re, “Metsi ao Nna ke o neang wona, e tla ba sediba sa Metsi, phororo, ho biloha ka hara moyo.”

²⁵⁵ A re, “Jwale, bea butle motsotso. O Mojuda, O rapela Jerusalema, mme bontata rona ba rapela thabeng ena,” le jwalo-jwalo.

²⁵⁶ A re, “Dumela ho Nna! Hora e a tla, le jwale e se e tlie, eo le sa tlo rapela Jerusalema leha e le thabeng ena. Empa Modimo ke Moya, mme ba Mo rapelang eka kgona ba Mo rapele ka Moya.”

²⁵⁷ Ntle le pelaelo mosajana a re, “Jwale, bea butle motsotso. Thaka lena ke Mang, le hona?” A batlile ha a ka Mo tseba hore E ne e le mang, hoba eka kgona a Mo tsebise Basamaria. “Ke Mang?” o itsalo.

²⁵⁸ A qoqa le yena metsotso e mmalwa. A re, “Mosadi, eya lata monna wa hao, mme le tle kwano.”

²⁵⁹ (Empa ho re, “Jwale O etsa ka bohlale,” le a bona.) A re, “Ha ke na monna.” Uh-oh!

²⁶⁰ Yaba lere le dula hodima sehlabelo. Le a bona, ha etsahala ho hong. Ha etsahalang? A bona mohlolo wa Modimo. Ho re, “O boletse nnete. Hoba, o bile le ba bahlano, le eo o dulang le yena jwale hase monna wa hao, ka hona o boletse nnete.”

²⁶¹ A retoloha. O tsebile hobane Modimo, ho batho, esale a shwa dilemo; baprista ba bona le borabbi, le ba jwalo, ba ne ba buile ka Modimo. Empa ka Bibeleng ho ne ho tshepitswe e Mong ya tla tla!

²⁶² A re, “Monghadi, ke a lemoha hobane O Moporfeta.” Le a bona? “Re a tseba hobane Messia o a tla.” (“Jwale ha nke ke kgodisehe mona.”) “Re a tseba hobane Messia o a tla.” (“Ke tla Mmotsa sena, mme ke tla bona hore polelo ya Hae ke efe; ha ho monna ya ka mpolellang seo, a sa tsebe Modimo.”) “Re a tseba hobane Messia, Ya bitswang Kreste o a tla. Mme, mohla A tlang, ke sona seo A tlang ho se etsa ha A fihla. Re Mo lebeletse.”

A re, “Ke Yena.”

²⁶³ Keha ho lekane. Keha ho lekane. A matha a kena motseng. A re, “Tloong, le bone Monna ya mpoleletseng tseo ke di entseng.”

²⁶⁴ Pele a ka tlisa molaetsa oo, o ne a loketse ho bona mohlolo wa Modimo pele. Pele a ka bona mohlolo wa Modimo, a lokela ho nka Modimo Lentsweng la Hae. Ke hantle haholo.

Oh, kgidi, ka moo re beng re ka tswelapele jwalo! Ha re nkeng e mong.

²⁶⁵ Pentekosta. Hoba ba tsamaye le Lentswe, hoba ba bone Lentswe, hoba ba dumele Lentswe; empa pele ba bona mohlolo wa Pentekosta, ba tlameha ho ikobela Lentswe. Le a bona? “Nyolohelang motseng wa Jerusalema,” Lentswe le itsalo, “mme le dule mono le tle le be le tlatswe ka Matla a tswang Hodimo.”

²⁶⁶ Jwale, hola hoba ho fete matsatsi a robedi, Mattheu a ile a sheba Mareka, mme a re, “O a tseba keng? Ke ile ka arubelwa ke maikutlo a makatsang tsatsi le leng, e tshwanetse ebe e ne e le Moya o Halalelang oo. O re laetse ho dula hodimo mona. Le a bona, e tshwanetse e be e ne e le Wona.”

“Oh, ha re hloleng letsatsi le leng hape.”

²⁶⁷ Letsatsi la borobong la fihla. “Be, jwale, O re laetse ho nyolohela mona, matsatsi a robong a fetileng. Ehlide, ana ha le dumele hobane re se re O fumane? Ke dumela re O fumane mohla re neng re dumela ho Yena. Ha le hopole jwalo na?” Oh, lona Mabaptise a matle! Le a bona? Ho re, “Ke a dumela. Ke dumela hobane re O fumane, hobane O re laetse ho nyolohela kwano. Mme na le tseba seo ke se dumelang? Ke a dumela, hona mohla re ne re nyolohela mona, re mametse seo A neng se buileng.”

²⁶⁸ Empa O itseng? Ha A re, “Mohla le fihlang hodimo mono, le tla O fumana.” Ha A re, “Hlolang matsatsi a mahlano, kapa matsatsi a robong.” O itse, “Ho fihlala!” Ke yona. “Ba emelang Morena, ba tla bona matla a matjha.” Le a bona?

²⁶⁹ Wena o etsang? Nka Lentswe la Hae, nka kgato hodima Lona mme o dule ho Lona. Letsatsi ka leng, oeme ka ditshetshekwanne kgahlano le Satane, ka Lona, “Ho ngodilwe! Ho ngodilwe! Ho ngodilwe! Ho ngodilwe! Ho ngodilwe! Ho ngodilwe! Ho ngodilwe!” E tshwanela ho etsahala! O ntse o nka kgato hodima Lentswe, o a bona, ke hona o tla bona mohlolo wa Modimo. Ke hantle. Empa pele o tlameha ho nka kgato hodima Lona.

²⁷⁰ Ba ile ba nyolohela hodimo mono mme ba ikobela Lentswe, ba dula mono.

²⁷¹ Letsatsi la borobong la fihla. Ke utlwa Petrose a re, “Le a tseba keng, ebe lona baena le nahanan?”

²⁷² Mareka o tshwanetse a be a ile a ema, mme a re, “Le a tseba keng? Baena, ha re O amoheleng ka tumelo feela, hobane re ntse re dutse kutlong.” Tjhe, o ntse o sa mamela ka bottlalo.

²⁷³ O itse, “Ke kolobeditswe ka lebitso la ‘Ntate, Mora, le Moya o Halalelang.’” Eo, hase kutlo tletseng eo. O a bona? O re, “Ke ngodisitse kerekeng.” Eo hase kutlo, o a bona. “Ke thothokisa Tumelo ya Baapostola.” E sa ntse e se kutlo eo. “Oh, moena, ke tlohetse leshano la ka le ho utswa. Ha ke sa etsa letho le lonya.” E sa ntse e se kutlo eo.

²⁷⁴ Eka kgona e be Tswalo! Ntho e nngwe e tlameha ho etsahala. O tlameha ho shwa, mme Ntho e nngwe e tswalwe ka ho wena.

²⁷⁵ Oh, ka mora matsatsi a makana ba eme, ha feta matsatsi a robong. Ba re, “Ha re E amoheleng, mme re tsweleng pele ka tshebetso ya rona ya lenseswe. Lefatshe le a shwa ka ntle ka mane, hobaneng re sa ntse re eme?”

²⁷⁶ Ke utlwa Petrose a re, “Empa, le a tseba, Ntho e mpolella hobane ha eso loke. Hoo ha se ho utlwa Lentswe ka nepo. Le

a bona, ha ekaba re lebeletse ho bona mohlolo oo Modimo a re tshepisitseng wona, wa ho romela Pallo ya Ntate hodima rona, re tlameha ho dula mona ho fihela ntho e etsahala. Hobane, Lengolo le e boletse e tla tla ka sebopheho sena, Joele o itse, ‘Ke tla tshela nama yohle ka Moya wa Ka. Bara ba lona le baradi ba tla porofeta. Hodima bahlanka ba ka le makgabunyane Ke tshele Moya wa Ka. Ke tla etsa dipontsho le meeka Mahodimong le lefatsheng.’ Esaiia moporofeta o itse, ‘Mme ke ka melomo e kokotletsang le ka dipuo di sele Ke tleng ho bua le setjhaba sena, mme ena ke sabatha eo ba lokelang ho kena ho yona. Hodima hona hohle, ba hanne ho e utlwa.’ Jwale, baena, re ke ke ra tswa mona jwalo, re sa bona le boiphihlelo ba mofuta, le a bona. Re tlameha ho fumana se seng, hobane O itse, ‘Le dule mona le tle le be le tlatswe ka Matla.’ Jwale ha ke eso fumane Matla a fetang ao ke bileng le wona mohla ke kenang mona. Ke hlotse mona bosiu bohole, ke hlotse mona bosiu bo latelang, ke hlotse masui a robong mona. Ke sa itshwanelo le mohla ke kenang mona. O itse re tla fuwa Matla, ka hona a re duleng re lebeletse.”

²⁷⁷ Yaba, hang, ha ba utlwile Lentswe la Modimo ka botlalo, yaba ba bona mohlolo wa Pentekosta. Ba bona Mollo o tsholohela ka mohahong. Topallo eo ya Mollo ya theoha, ho kena hara batho; mme malakabe a maholo, a kang maleme a arohaneng, a dula hodima e mong le e mong wa bona. Mme ba tlatswa ka Moya o Halalelang, mme ba qala ba bua dipuo di sele, kamoo Moya o ba buisang kateng.

²⁷⁸ Ntho ya etsahala neneng? Ha ba—ha ba etsa qeto ya ho, ya hore ba se ba O amohetse? Tjhe. Ha ba ne ba utlwa Lentswe la Modimo ka botlalo, ba bone mohlolo wa Pentekosta. Ho jwalo le kajeno, o tlameha ho etsa jwalo.

²⁷⁹ Jwale, metswalle, ruri ke tlilo kwala ka ena. Ha ke sa tla phetla leqephe le leng. Ho lokile, monna ya latelang a itokise ha ke bua sena.

²⁸⁰ Jwale, leha kwana ho bitswa ntho e nngwe le e nngwe e ka bitswang, ba babe, “mohalaledi ya thethehang, mopenTekosta, motjhwtla-kereke, moikaketsi, Belsebule, raditoro.” Ntho e nngwe le e nngwe e ka bitswang, re bitswa yona. Empa ba etsang, ho o bitsa eng? “Raditoro, Belsebule, moporofeta wa bohata, Jesus Only,” ntho e nngwe le e nngwe e ka bitswang, ntho e nngwe le e nngwe e mpe e ka bitswang.

²⁸¹ Empa, ka ho dumela Lentswe la nnete la Modimo, moporofeta wa Hae wa nnete wa Lentswe, re etsang? Re bona dintho tseo re di bonang.

Oh, ba tla tswa Botjhabela le Bophirima,
Ba tla tswa mafatsheng a hole-hole,
Ho keteka le Morena’ rona, bamemuwa ba
Hae dijong;
Baeti baa ba lehlo’nolo ha kakang!

Ba bohileng ‘Fahleho sa Hae se kgethehileng
 Se benya lerato le Mokgethwa;
 Majalefa a lehlo’nolo a mohau wa Hae,
 Ba benya sekä mahakwe moqhakeng wa Hae.

Jesu o tla kapele,
 Ke moo diteko tsa rona di tla fela.
 Oh, ha Morena’ rona a ka tla nakong ena
 Ho tlela ba lokolotsweng sebeng?
 Oh, na e tla o tlisetsa thabo,
 Kapa swabo le sarelo e tebileng?
 Mohla Morena’ rona a tlang ka kganya,
 Re tla kopana le Yena sebakeng.

²⁸² Hobaneng? Re nka kgato hodima Lentswe la Hae! Amen. Bitsa ntho e nngwe le e nngwe o e batlang. Re bona pontsho ya Messia hara rona. Re bona Topallo ya Mollo. E ke ke ya latolwa! Ho re bitsa sohle seo ba se batlang. Modimo o teng mona. Mahlale a katladitse setshwantsho sa Yona. Hobaneng? Ho utlwa Lentswe la Hae! Ha eso etsahale nalaneng, empa leha ho le jwalo leihlo la motjhini wa khamera le re ke Yena, ho na le Lesedi le otgileng lense. Hobaneng? Ho nka Modimo Lentsweng la Hae pele! Dihlopha tsa bodumedi di ka o rahela ntle, ha di batla. Ba ka o fa seholoholo sa bona, ha o batla jwalo. Empa ako nke kgato hodima Lentswe la Modimo, ha ekaba o batla ho bona mehlolo ya Modimo!

²⁸³ Jesu o tshepisitse, “Jwaloka matsatsing a Sodoma, ho tla ba jwalo ho tleng ha Mora motho.”

²⁸⁴ Lengeloi leo le ile la theoha, Modimo a hlahile ka mmele wa motho, mokokotlo wa Hae o furaletse tente, le ho re ho . . . mokana, a sa tsebe Abrahama, ho re, “Abrahama.” E seng Abrame; A sa tswa fetola lebitso la hae, matsatsi a mmalwa pele ho moo. “Sara, mosadi wa hao o kae?” E seng S-a-r-a-i. S-a-r-a-h! “Sara, mosadi wa hao, o kae?” A mmitsa ka lebitso la ntate, mme yena ka lebitso la hae la mofumahadi. Oh! E ne e le Mang? Abrahama a tseba hona hoo hore Eo e ne e le mang.

O itse, “O ka tenteng, ka mora Hao.”

²⁸⁵ A re, “Ke tla o etela, Abrahama. Nna, Ke tla o etela, ho ya ka tshepiso ya Ka eo Ke o fang yona, hoba esale o lebeletse dilemo tsena tsohle. Esale o e lebeletse dilemo tse mashome a mabedi a metso e mehlano. Wa dula Lentsweng hantle, ho nka kgato hodima Lentswe. Wa ba wa hana hore o ne o le wa lefatshe. O fetohile mojaki le molata. O ntse o batla Motse o tlang ho tla, oo Mohahi wa Wona le Mothei e leng Modimo. Ke o tshepisitse hoo, ka ngwana enwa ya tlang ho hlahla, hore o tla . . . o tla ba ntata ditjhaba tse ngata. Ke e tshepisitse. O ile wa nka kgato hdima Lentswe, jwale o tlilo bona mohlolo wa Modimo.”

“Ke tla o bona jwang, Morena wa ka?”

“O kae Sara, mosadi wa hao?”

“Ka tenteng, ka mora Hao.”

Ho re, “Ke tla o etela, ka nako ya bophelo.”

²⁸⁶ Mme Sara a itshehela ka ho yena, ho re, “Ho ka tla jwang hore nna, motsofe wa mosadi; le morena wa ka, o tsafetse, le yena; re ka hla ra boela ra nyakalla na?”

A re, “Hobaneng Sara a tshehile?”

²⁸⁷ A ile a nka kgato hodima Lentswe la Modimo. O ne a bona mohlolo wa Modimo.

²⁸⁸ Jesu o itse, “Jwaloka matsatsing a Sodoma, ho tla ba jwalo ho tleng ha Mora motho.” Le a bona, nka kgato hodima Lentswe la Modimo, mme o tla bona mohlolo wa Modimo.

²⁸⁹ E ne e le eng? Mohla re emeng mona, nakwana e seng kaalo e fetileng, ho rera *Mengwaha Ya Kereke*, le ho e theola, mme pontsho e nyenyane eo e hodima mono, ya e taka hodima letlapa mona. Mme hantle ka hara mokgupi wona, pontsheng ya batho ba fetang ba dutseng mona jwale, hang feela hoba ke qete ho bua, Lesedi la benyetsa fatshe, mme la ya morao mono la lopalla leboteng leo. Mme seriti sa akgelwa hodima lona, nakong eo motho e mong le e mong a le shebileng, mme la lekanya mengwaha eo ya kereke hantle kamoo e leng kateng mono. Ba ba kae mona jwale ba neng ba le teng mona tsatsing leo, phahamisa letsoho la hao. Le a bona? Ho e sheba ka mahlo a lona ka sebele! E ne e le eng? Pele, ho dumela Lentswe la Modimo, ho rera Lentswe la Modimo, ho amohela Lentswe la Modimo; mme ra bona mohlolo wa Modimo o thasisetsa Lentswe, hore Le ne le lokile.

Oh, Jesu o tla kapele, (mmoho bohle)

Ke moo diteko tsa rona di tla fela.

Oh, ha Morena' rona a ka tla nakong ena

Ho tlela ba lokolotsweng sebeng?

Oh, na e tla o tlisetsa thabo,

Kapa swabo le sarelo e tebileng?

Mohla Morena' rona a tlang ka kganya,

Re tla kopana le Yena sebakeng. Amen.

²⁹⁰ Hobaneng? Re dumela Lentsweng la Hae, ho boloka Oli ka hara lebone, le kutilwe le a tuka, “Lesedi la lona le kganyetse batho jwalo ba bone mesebetsi ya lona e molemo, ditholwana tsa lona, ho tlotsisa Ntate ya Lehodimong.” Mme ho tla etsahalang? Ho dumela Lentswe la Modimo, le ho nka kgato hodima Lentswe la Modimo, re tla kopana le Yena sebakeng. Seriti sa pelaelo ha se yo! Modimo a le hlohonolofatse.

²⁹¹ Ke tilo kwala, ke batla ke entse karolo ya nngwe-tharong. Ke tla e phethela ka mohla o mong, ha Morena a ratile. “Ha ekaba Modimo a ena le rona, e kae mehlolo ya Hae?” Le a bona? Le a e dumela na?

²⁹² Oho Modimo, re dumelle ho bona e—e selemo se tlang. Re dumelle ho bona selemo se tlang, hoo dipelo tsa rona di sa tlo kgotsofalla sehlopha sa bodumedi, kapa tumelwana, ho tsukutla letsoho, kapa e, seo ho thweng ke, borapedi. Re se ke ra kgotsofala pele re utlwa Matla a etsang mohlolo, le Modimo a nka yona... ka dipelong tsa rona ka sebele, ho ntsha lefatshe, le ho bopa Kreste. Jwale, e seng bosiusng bona, mme hosasane ho qalwe ho etswe ntho e sele; empa ho hola ka ho Yena, ho fihlela seemo sa Hae. Re holela ho Yena, ho fihlela re kopana le Yena. Ha re inamiseng dihlooho tsa rona.

Sebaka, sebaka, e, sebaka se teng,
Sebaka sa hao se teng Sedibeng;
Sebaka, sebaka, e, sebaka se teng,
Sebaka sa ka se teng Sedibeng.

²⁹³ Ntata rona ya Mahodimong, ka boikokobetso ba pelo le moyo, lenseswe la ka le tjhele, mme mantswa a mmalwa ana a kgaohaneng dikoto, Morena, ke O rapela ho a nka le ho a rokella hammoho; ha ke tsebe ho etsa hoo, haese feela ho bua se fihlang kelellong ya ka. Ako o tebisetse pelong ya motho e mong le e mong, mme ba o bone mme ba o dumele, ka sepheo seo o hlahisitsweng ka sona. Mme, Ntate, o tle o ba etsetse mabaka, o tla ba tlisetra Kreste. Ako re hlohonolofatse bosiusng bona, Ntate. Re lebeletse, ho nka kgato hodima Lentswe la Modimo.

²⁹⁴ Hlohonolofatsta baena bana, Morena. Ntshwarele, Ntate, ka ho nka nakwana ya bona. Ke O rapela ho ba tlotsa ka Moya o Halalelang, hoo Matla a Modimo a tla tsholohela ka mohaho mona, mme baetsadibe ba tle aletareng le—le ho lla leetong la bona ho ya Kalvari, le hore bakudi ba tle ba fole, mme ho etswe dipontsho tse kgolo le meeka, mme re tle re bone Matla a sebetsang mohlolo a Modimo o phelang. Re emetse hoo, Ntate, ka Lebitso la Jesu. Amen.

²⁹⁵ Ho roriswe Morena! Le a Mo rata? Ha ekaba Modimo a ena le rona, re ke re bone pontsho ya Hae!

²⁹⁶ E kae pontsho ya Messia e leng yena maobane, kajeno, le ka ho sa feleng? Ha eka ba Messia eo a tshwana, O tla ba le pontsho e tshwanang. O ho kae na? Ke leloko la mokgatlo ofe? Re ka ngodisa mokgatlong ofe, mme ra fumana Messia, pontsho ya Hae? Re ka kena tlung efe, ho E fumana? E nahaneng.

Ke mohau, Moena Neville.

[Kgaitsedi o bua ka leleme. Moena o a fetola—Mong.]

Amen. Ho bokwe Jesu. Jesu ya bokwang! Kea leboha, Morena. Kea O leboha.



*HA EKABA MODIMO A ENA LE RONA, E
KAE MEHLOLO YOHLÉ? SST61-1231E*
(If God Be With Us, Then Where Is All The Miracles?)

Molaetsa wona, ka Moena William Marrion Branham, o rerilwe sethatong ka Senyesemane mantsiboya a Sontaha, Tshitwe 31, 1961, Tabernakeleng ya Branham e Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2014 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org